



青浦縣志

卷十七 人物一	卷十八 人物二	卷十九 人物三
------------	------------	------------

ル 5
3097
7







門 儿 5
號 3097
卷 17

青浦縣志卷十七

人物一

列傳

陸康

陸贄

金獻民

陸樹德

陳子龍

曹一士

陸遜

章棻

徐階

徐石麟

沈荃

胡寶瓌

陸抗

衛涇

陸樹聲

李世祺

王原

王昶

漢陸康字季甯續之孫也遠祖烈為吳令卒葬胥亭子孫遂為吳人華亭之有陸氏自此始曾祖閔篤行有令德建武中為尚書令姿容如玉喜著越布單衣帝升臺見之歎曰南方

青浦縣志

卷十七

人物

一

固多佳人康少修操行太守李肅察孝廉肅後坐事死康送其喪還潁州行服除高成令罷遣徭役以恩信爲治百姓大悅遷武陵桂陽樂安三郡太守所在稱之靈帝欲鑄銅人詔民田畝斂十錢康疏諫不聽檻車徵詣廷尉侍御史劉岱救之免歸後起爲廬江太守申明賞罰破賊黃穰等有功獻帝卽位天下大亂康間道奉貢加忠義將軍袁術屯壽春兵饑遣使求委輸於康康惡其叛逆絕不與通術怒遣將攻之康因使從孫遜子績將家還吳居於長谷長谷在今縣治西南境術圍康二年廬江城陷康尋卒年七十朝廷憫其守節康子儁爲郎中續續自有傳

吳陸遜字伯言本名議祖紆城門校尉父駿九江太守皆有名德爲邦族所懷遜少依從祖康廬江年長於康子績數歲既還吳爲之綱紀門戶年二十一始仕孫權幕府權妻以兄策女數從遜訪世務呂蒙謂權曰陸遜意思深長才堪負重觀其規慮終可大任權乃拜遜偏將軍右部督代蒙屯陸口後克公安南郡拜撫邊將軍封華亭侯是歲建安二十四年也蜀漢章武元年昭烈帝自將伐孫權權請和不許命遜爲大都督拒之戰於夷陵漢軍敗績加輔國將軍領荊州牧帝禪卽位諸葛亮輔政與權連和時事所宜權輒令遜語亮并刻印置遜所權每與漢帝及亮書常過示遜輕重可否有所不安便令改定以印封行之魏大司馬曹休入皖遜再起爲大都督假黃鉞休破振旅過武昌權令左右以已蓋覆遜寵賜無與爲比建興七年權僭稱帝改元黃龍拜遜爲上大將軍右都護是歲權遷都建業畱輔太子并掌荊州及豫章三

郡事吳赤烏七年代顧雍為丞相其兼官如故先是太子登卒權立和為太子全琮附魯王霸構太子遜上言太子正統宜有磐石之固魯王藩臣當使寵秩有差不聽會太子太傅吾粲坐數與遜交書下獄枉死遜憤恚卒年六十三家無餘財孫休時追謚曰昭侯遜乃心在國疏凡數十上皆關大計陳壽評之曰遜忠誠懇至憂國忘家庶幾社稷之臣遜初封華亭進封婁侯東南名臣遜為之冠云

陸抗字幼節遜次子也初拜建武校尉赤烏九年遷立節中郎將與諸葛恪換屯柴桑臨去繕完城圍葺其墻屋居廬桑果如其始至魏將諸葛誕舉壽春降抗赴之遷征北將軍孫皓即位加鎮軍大將軍都督信陵西陵夷道樂鄉公安諸軍事治樂鄉時都下政令多闕閹宦弄權抗先後疏陳時宜極

諫鳳凰元年西陵督步闡叛降晉晉車騎將軍羊祜率師向江陵初江陵平衍抗勅江陵督張咸作大堰遏水以絕寇叛祜欲因所遏水浮船運糧揚聲將破堰以通步軍抗聞使咸亟破之而自率三軍趨西陵祜至當陽聞堰敗乃改船以車運大費損功力抗至西陵祜將揚聲來攻敗之祜引去遂拔西陵誅闡以功加拜都護貌無矜色謙冲如常抗在鎮常戒其邊戍各保分界於是吳晉之間餘糧栖畝而不犯牛馬逸入境可宣告而取抗與祜宛然有僑札之好二年就拜大司馬荆州牧明年疾病遺疏言西陵建平國之蕃表乞增兵馬實疆場言辭痛切抗既卒天紀四年晉軍伐吳龍驤將軍王濬順流東下所至輒克終如抗慮抗五子晏景見後忠義傳機雲見文苑傳

唐陸贄字敬輿瑁之後也父侃溧陽令大歷二年贄年十八登進士第再中博學宏辭科補尉德宗立遣黜陟使行天下贄請以五術省風俗八計聽吏治三科登俊又四賦經財實六德保疲療五要簡官事時皆趨其言帝狩奉天贄以翰林學士從機務聞總遠近調發書詔日數百旁吏承寫不給他學士皆閣筆贄應之沛然有餘贄孤立一意遇事極言得失無所回諱帝還京天下屬以為相而以直諫陰失帝意久之不拜貞元七年罷學士以兵部侍郎知貢舉得韓愈歐陽詹諸人皆天下孤雋傑士時謂之龍虎榜明年竇參罷黜乃以中書侍郎同中書門下平章事贄既入相忠懇奮發知無不言頃之帝用裴延齡判度支贄疏其姦佞力爭之帝不悅罷贄太子賓客再貶忠州別駕順宗立召之未至而卒年五十

二贈兵部尚書謚曰宣始贄入翰林年尚少以材親任在奉天朝夕居中參裁時號內相嘗為帝言今盜滿天下陛下宜痛自咎不吝改過收人心帝從之興元詔下武人悍卒皆為感動流涕有識於是知賊不足平贄蓋有力焉贄嘗曰吾上不負天子下不負所學惟贄能力踐其言奏議凡若干篇後世奉為金鑑 國朝道光六年從祀孔子廟庭按宣公居華據青浦西南境分自華亭邑中相傳有宣公墓在南門見諸聯明齋小識因援屠隆祀機雲之例列之又案姚宏緒松風餘韻云華亭之設割嘉興東境隸焉自天寶十載至大歷二年為時未久宣公或仍祖父舊貫亦未可定

宋章棗字質夫建安人也少以叔父得象蔭補官應舉入京試禮部第一元豐時監華亭鹽樂青龍風土遂家焉邑之有章氏自棗始元祐初棗知慶州時朝廷方捐葭蘆四砦予夏夏得砦益驕棗言夏嗜利畏威不有徽艾邊不得休息宜稍

取其疆土如古削地之制固吾圉然後以兵蹙之乃可七年三月夏集兵韋州窺環慶竄遣驍將折可適統涇原兵八千一日夜馳至韋州設伏敗之其年十月乾順母梁氏自將寇環州竄預毒牛圈豬水夏人馬飲者多死伏兵洪德邀其歸路士卒識梁氏旗幟爭鼓譟出大敗之未幾內召紹聖二年知渭州合兵夫七十萬具版築築城於石門峽好水川之陰以逼夏夏人來爭不得既成賜名平夏城既而環慶鄜延河東熙河相繼進築夏人凶憤乃合四十萬眾攻平夏竄遣輕騎夜襲之擒其統軍鬼名阿埋夏人大震竄在涇原四年凡築一城九砦薦拔偏裨降人皆得其用夏自平夏之敗不復能軍遂請命乞和竄立邊功為四方最累拜同知樞密院事致仕卒謚莊敏初竄官華亭濬青龍江民賴其水利又築思

堂蘇軾為之記今縣治北松澤里有章廟奉竄香火久遠

陳繼儒云松江青龍鎮有章氏自莊敏始至元中夢賢以孝友薦舉正其裔孫宋時科第甚盛書院記及青龍雜誌可據未可

以寓公列也前志案列名宦今本陳府志改

衛涇字清叔其先齊人唐末避亂居秀州之華亭涇少立志操從永嘉李去智學李卒制服執喪淳熙十一年以崑山籍登進士第一授承事郎特與添差涇以對策陳添差之弊三上表乞待次上以涇能踐言知重始進許之故事狀元初任滿必通謝宰執時王淮秉政涇不謝十四年除秘書省正字輪對言振綱維作氣節凡數千言紹熙二年正月震電雨雪涇上封事言雷陽也雪陰也陽方升而陰制之以象類求為君欺於臣夫陵於妻小人害君子有一於此皆足致亂不可不預防其漸時佞倖用事李后悍妒故涇以為言慶元三年

以起居舍人假工部尚書使金初涇之往甯宗實使覘國有乘釁之意還奏一敵滅一敵生願無以金之危亡為喜欲以戒之未幾韓侂胄用事正人屏斥涇優閒十年於里中關西園名其堂曰後樂後侂胄伏誅涇有力焉累官資政殿學士卒謚文節涇出入內外四十餘年始終持一節薦進人才汲汲如不及與朱熹交善侂胄之誅奏召熹還朝而熹卒因檄取諸經四書傳註刻之又為張栻請謚人稱涇能崇正學明金獻民字舜舉海隅鄉五十保人父爵成化五年進士官至副使其先有戌籍在蜀獻民遂以綿州籍登成化二十年進士除行人宏治初授御史巡按雲南順天並著風裁劉瑾亂政追坐獻民前勘地讞獄不實斥為民罰米瑾誅起用世宗即位召為左都御史劾奏奸黨王欽王銓不宜貸死不聽

尋由刑部尚書晉兵部會有星變獻民請勅天下鎮巡官豫戰守之備且請用賢納諫罷土木屏玩好帝頗採納獻民伉直有執持章上帝或不能從卒無所徇先後論奏太監邱福等弟姪養子不宜蔭官濫竊名器聞者避之尋引疾歸未幾錦衣千戶王邦奇訐前尚書彭澤辭連獻民奪職閒住初大禮議起獻民偕廷臣力諫帝不悅由是得罪隆慶初贈太子少保謚端簡二子皋皞皆正德時進士出仕徐階字子升世居小蒸父黼宣平縣丞階生五歲從父道括蒼墮嶺衣絛於樹得不死嘉靖二年進士第三人在翰林與張孚敬議禮不合斥外皇太子出閣召之帝察階勤累予遷擢年未滿五十已為大學士參與機務密白咸甯侯仇鸞罪狀奪其大將軍印時嚴嵩當國欲因鸞以傾階及聞鸞罪發

自階中夜扶牀行咄咄曰吾年長於階而智何少也由是心忌階而帝自鸞誅益重階數與階謀邊事寵任亞於嵩頃之兵部員外郎楊繼盛劾嵩帝下繼盛錦衣獄疏中詞連二王將加根究階以危語動嵩事得寢繼盛既死言者未已帝漸厭嵩會御史鄒應龍劾嵩及嵩子世蕃貪恣狀帝遂勒嵩致仕下世蕃於獄抵罪初階患嵩專久之不得發乃陽事嵩欲使嵩不疑而言者劾嵩嵩輒意階主使階頗危至是劾嵩當罪實階主之卒以敗嵩人於是服階深人能以忍濟也嵩敗階代嵩為首輔先是南北用兵邊鎮大臣小不當帝指輒逮下獄階當國以寬大廣帝意緹騎省減詔獄漸虛嘗榜三語於直廬曰以威福還主上以政務還諸司以用舍刑賞還公論一時翕然推階為名相帝餌丹藥病燥戶部主事海瑞上

疏極諫帝怒欲殺之階力救減死未幾帝崩階草遺詔齋醮土木織作悉罷前議大禮言事得罪諸臣一切赦復之詔下朝野感動號哭階智畧過人應變無窮在政府能持大體事具詳明史階告歸後為高拱所齷盡奪其田二子璠琨遺戍拱黜事乃解萬曆二年階年八十一卒贈太師謚曰文貞階籍華亭別業在鳳凰山金澤西余並有階故迹云
陸樹聲字與吉初冒林姓居林家角世力田樹聲少自振拔好讀書嘉靖二十年中進士第一授編修嚴嵩稱壽觴同館皆更緋衣樹聲獨衣青嵩目懾之不為動也再告再起皆南為南祭酒著條教十二訓勵諸生神宗嗣位即家強起之拜禮部尚書初樹聲屢辭朝命中外高其風節遇要缺必首舉樹聲張居正當國以得樹聲為重先具禮詣之樹聲對之穆

然居正失望去歲終陳四方災異請帝循舊章省奏牘慎賞
 賚防壅蔽納讜言崇儉德攬魁柄別忠邪詔皆嘉納萬厯改
 元連疏乞休居正語樹聲弟樹德曰朝廷行相平泉矣平泉
 樹聲別號也樹聲以上虛拘之請愈力乃命乘傳歸辭朝陳
 時政十事中言用內侍以給掃除而倒持旁落之漸不可不
 防優外戚以示眷異而非分無厭之求不可不節語皆切中
 時弊樹聲身長八尺端重有威儀穆宗登極趣起未赴趙貞
 吉遺以書云不敢以機務相煩第欲令主上一見丰采知先
 朝培養得如此偉人耳其為時推重如此家居篤內行事兄
 某老而彌謹嘗與客言少貧賤兄命糞治場圃不如法怒杖
 之今屋旁地猶是也欲受兄教如少年其可得耶年九十七
 卒贈太子太保謚文定子彥章萬厯十七年進士端介有父

風官至南京刑部侍郎先是彥章以行人告終養詔給月俸
 異數也互見藝術傳

陸樹德字與成樹聲弟也少與兄同學中嘉靖四十四年進
 士除嚴州推官奉部使者檄巡郡按論武弁某不法事卻金
 著節行取授刑部主事屢遷都給事中在穆宗朝章凡數十
 上穆宗御朝不與羣臣接語樹德言易上下交為泰今睽隔
 若此何以劇君德酬萬幾皇太子出閣疏言睿學三事以講
 讀責之疑丞以起居嚴之內侍以儀刑本之身教隆慶六年
 四月詔輟東宮講讀樹德言自四月至八月為時甚長請非
 盛暑仍出御講筵會歲大早日食請帝修省未幾帝不豫又
 疏亢陽之月宜益慎起居藥餌毋滋壯熱毋伐晏陰毋撓甯
 靜內臣請祈福戒壇樹德上言陛下欲保聖躬宜法大禹之

惡旨酒成湯之不邇聲色何必奉佛疏皆留中不報神宗既立中官馮保橫甚樹德疏發其奸保大恨大禮議起樹德請毋祧宣宗仍祀睿宗世室既又極陳民運白糧之弊一時言官侃直無出樹德之右保陰扼之留滯南都七年萬曆十年以太僕卿改北是冬擢右僉都御史巡撫山東德王張具大明湖肅樹德為客謝不往曰撫臣與藩王杯酒流連兩損威重非所以令眾庶見也在官約束僚吏屏絕聲伎清嚴著稱乞歸先樹聲數年卒子彥禎萬曆二十三年進士官南吏部考功司主事有才識孫景朋曾孫慶紹皆舉人

徐石麒字寶摩本嘉興人以青浦籍成天啟二年進士授工部營繕司主事筦節慎庫中有人有所調發石麒輒格之以令甲魏忠賢銜之會御史黃尊素下詔獄石麒營救忠賢怒誣

以贓削籍崇禎三年起官南京其在吏部佐尚書鄭三俊主南計澄汰公允署應天府尹革除僉報馬戶之弊十一年春入賀元旦三俊方為刑部尚書以輕比失上意下獄石麒疏救上即釋之石麒起廢籍至是始入為左通政累遷刑部侍郎轉左尋擢本部尚書時治尚苛細石麒因糾附會律文之謬者數十事多所平反然亦未嘗專主姑息一時大案皆經其論定最後爭姜垓熊開元之獄落職聞注福王監國起右都御史改吏部尚書時馬阮亂政石麒輒論祖宗之法裁之未幾為士英所扼遂引疾去明年南都不守六月浙湖義師起石麒與參謀議及嘉興城將破石麒在城外至城下呼曰吾大臣不可野死當與城存亡城上人譁曰吾公來矣開門納之越宿而城陷石麒朝服自縊死時戢山劉宗周在越城

餓經七日曰此降城非吾死所乃出城外而死海內為作降城歎我公來樂府以美之先是石麒麟未死或勸之避地不可曰吾東向馬阮將謂我壅立潞王西向謂我與臥子將興晉陽之甲惟有死此一塊土耳其臥子陳忠裕子龍之字也石麒麟博聞強識尤熟於朝章國紀性樂易好汲引人才 國朝乾隆四十一年 賜謚忠懿

續修志列之

按石麒麟居邑之奈山見於其詩王昶辨前志不列為遺漏今遵昶

李世祺字壽生天啟二年進士崇禎三年擢刑科給事中陳大計之當定者二曰兵食之計民生之計大弊之當釐者三曰六曹之弊在吏胥邊吏之弊在欺隱貪墨之弊在奢靡夏旱帝禱雨未應疏列恤畿甸緩催科預儲備三說帝並納之帝遣中官監視諸鎮世祺上言內臣入奉天顏出司兵食既

得陰伺內廷意旨又得顯操外廷事權害何可言自魏忠賢盜弄神器要地盡置私人奈何躬自翦之復自蹈之不納時進言者多獲譴帝方曰親細務任察為明世祺言江海為百谷王以其善下今言官輒蒙詰責詰責未已貶黜隨之恐開臣工瞻顧之漸且天子一日萬幾神太用則疲精太用則竭聖人使公孤百職環列任事但責其成不侵其事課其效不紊其權奚必效後世察察之治帝不能用八月淫雨損山陵昌平地動又上疏極論時敝大畧謂中樞決策掩耳盜鈴主計持籌醫創剜肉州縣迫於功令報最不前曹部窘於簿書救過不暇因一人可議疑及眾人則嫫母西施同在暗室因一事可訾連及他事將伯夷盜跖俱成竊鈇黃衣之使四出軍容之坐上踞精神皆為容悅固寵之用中外遂無緩急可

倚之才因請帝采公論酌事情釋疑忌之根開功名之路庶天變可回時艱可濟帝以世祺借端瀆奏切責之七年疏劾大學士溫體仁吳宗達及兵部尚書張鳳翼溺職狀帝怒貶福建按察使檢校且追罪文選郎吳鳴虞考選非人亦貶三秩御史龔廷獻論救不聽久之起行人司副十五年遷太僕寺卿國變後削髮爲僧坐臥一小樓足不履地數年卒世祺居邑東門道光時邑人士卽世祺舊居東皋草堂爲祠祀之陳子龍字臥子居廣富林父所聞自有傳子龍生有異才詩古文辭卓絕流輩嘗與夏允彝徐孚遠等結幾社海內宗之崇禎十年第進士謁選得惠州推官未赴丁憂服闋改紹興時流寇日急子龍練軍足食慨然有濟世之志十六年冬南都糧餉告急各郡無應者子龍獨以米七萬石至是歲東陽

許都作亂子龍奉檄勦撫事平以功擢兵科給事中命下京師失守乃事福王於南京首陳防口之策莫過舟師請專委兵部主事何剛訓練從之又抗言自古中興之主莫不身先士卒故能光復舊物今人情泄沓無異昇平清歌漏舟之中痛飲焚屋之內不知終極可爲寒心因條上經畧荆襄布置兩淮之策歷陳先朝致亂之由在於上下相猜朋黨互角當引爲鑒誠又請召還故尙書鄭三俊御史易應昌疏薦舉人祝淵太學生涂仲吉可任言官最後抗論詔選宮女非法子龍在言路五十日章三十餘上皆當時至計而時宰齟齬之遂以去位子龍去而國事益不可爲弘光元年五月南都不守各郡義兵並起子龍偕允彝陰爲之主辦大兵下松江允彝殉節子龍以大母年九十不忍割遁爲僧尋受閩浙二

王之命結太湖兵謀起事丁亥以吳勝兆獄辭牽連被獲操江都御史陳錦見其髮髻髻然詰之子龍抗聲曰畱此髮以見先皇帝地下遂乘間投水死時五月十三日也年四十門人王澐僕吳西求其尸聞鴉聲得之毛竹港遂葬之廣富林先墓允彝字彝仲華亭人與子龍同登進士授長樂知縣舉天下賢能第一福王時擢吏部考功司主事先子龍自殉子龍葬之嘗為報書數千言焚於其墓言已所以未死之故期於不負初志以見死友子龍允彝皆負天下重名忠孝激發洞曉世務人稱陳夏乾隆四十一年賜子龍謚曰忠裕與允彝合祠吳西者子龍輿人久從役不去子龍殉節後時時見夢於西西故嘗學寫真因私祝曰公誠欲西圖像耶是西素志也殫思竟日曰得之矣操筆圖之絕肖今像石刻尚存

云

國朝沈荃字貞蕤一字繹堂居沈巷幼孤事母至孝順治九年第三人進士授編修出為大梁道以憂去服闋補通薊道聖誤左遷甯波同知未行特旨召見復四品冠服仍入翰林累官禮部右侍郎兼詹事康熙二十三年卒官賜祭葬予謚文恪著充齋集充齋者荃巡大梁時謁夏峯孫奇逢夏峯為講充實之義有省遂以自號焉荃學行醇潔書法最有名聖祖嘗召入內殿賜坐論古今書法凡御製碑版及殿廷屏障輒命荃書之其屏風箴一篇得人臣規獻之體箴曰天子當辰設黼攸崇高張軒席廣樹堯宮義取閑邪匪曰塞聰爰在後世因號屏風奢則琉璃侈惟雲母珠絲龜甲五采錯組豈若漢廷列女作譜唐宗操翰網羅今

古我 皇睿哲置此坐隅立必直方處若盤盂不施雕刻亦
 謝丹塗素齊魏製麗滅晉模穆穆皇皇緝熙止敬履信居仁
 形端表正列疏題名親賢樂諍不偏不陂永載甯靜後荃子
 宗敬以編修入直 上命作大小行楷使內侍傳 諭李
 光地曰朕初學書宗敬之父荃實侍屢指陳得失至今每作
 書未嘗不思荃之勤其沃荷 聖眷若此荃立朝有丰采好
 獎進士類先是官大梁善於治盜劇盜董天祿等悉就擒禹
 鄭十二州縣苦河夫柳束及軍需供億過繁民困甚荃為申
 請得減三之一學宮圯出俸新之復修河南通志既成上之
 詔天下郡縣修志一以河南為法在詹事時疏言青宮在
 於豫養因以明臣霍韜聖功十三圖進未幾復疏列出閣四
 事皆報聞故事詹事得與會議荃於民生利弊時政得失剴

切詳言畧無瞻徇康熙十八年旱 詔求直言時新例罪當
 流者皆徙烏喇極北公謂烏喇距蒙古三四千里地不毛極
 寒牛羊橐駝凍輒倒斃罪不應死者不應驅之死地乃獨為
 疏上之有 詔令畫一荃持前議益堅且曰此議行三日不
 雨者臣願伏欺罔罪 聖祖改容納之越二日大雨盈尺
 例竟罷宗敬入婁籍仕至大常寺少卿亦以書畫名於時
 王原字令詒一字學庵晚號西亭居啟聖里後遷來蘇門附
 郭父夢求歲貢生詩文見稱於陳子龍原登康熙二十七年
 進士未及用從刑部尚書徐乾學修一統志於包山三十三
 年選廣東茂名縣知縣茂名徵糧責之里長里長壓派於民
 戶一石至銀二三十兩民棄田逃原令編造業戶實名里長
 之弊遂革初逃戶棄田遺糧攤諸鄰戶歸則并數年之所攤

責之以是逃者卒不敢復原代爲捐輸不許派累而逃戶之歸者日集邑有人市賣鬻妻子以爲常下令有犯者繩以法人市始除邑故夷徼地荒俗敝原又爲禁巫覡鋤強梁雪冤滯頌婚葬之式設義學教之頌聲大作移署信化以新興解犯脫逃牽連解任再起補貴州銅仁縣縣荒且僻視茂名益甚原至建學以訓子弟教民治葛以爲布焙茶榨油以爲用谿水湍急教之造舟以興販設保正保副訓練鄉勇備苗苗寨皆爲設長貳約束之羣苗貼然銅仁大治四十一年行取授工科給事中條陳苗疆事宜一曰嚴通苗之禁例一曰定土司之處分一曰飭汛弁之勦勦又疏請裁衛所改隸州縣皆目擊時弊言鑿鑿平陽府知府馬思贊請以天下錢糧加一火耗作爲正供原力陳其不可議遂寢繼劾吏部文選司

郎中陳汝弼婪縱不法事得實尋牽連降級以歸原少力學受業陸清獻隴其湯文正斌之門精研理道一以濂洛爲宗年八十四卒著書甚多詳具藝文

曹一士字諤廷本上海人年十五補青浦諸生有名雍正四年舉順天鄉試八年成進士由編修擢山東道監察御史轉工科給事中卒官一士在諫垣伉直敢言所陳奏多見施行如言各省開墾有名無實十年之後將爲民患請加覆勘詩文筆札偶涉疑似不可比附妖言之律一切告訐宜禁又言牧民之吏賢能不可偏廢今督撫薦舉往往舍賢尙能故明作有功之意多愷大成裕之意少損下益上之事多損上益下之事少治體所關急宜調劑又言臺省異地故科道分曹科臣職掌惟司封駁專責以言不任他事自雍正元年屬之

都察院其後城倉漕鹽諸差與御史一體開列奔走不皇坐
 荒本職宜考正六科之制使臺自為臺省自為省以遷其舊
 再會典載內閣交出密本由各科挂號然後發部今各科祇
 有紅本而密本不得見至 諭旨徑由內閣發部者遲至浹
 旬始得從邸抄一讀即欲有所論列事已無及嗣後請聽科
 臣派出筆帖式二員每日赴閣謹抄 諭旨并所發密本庶
 得隨時論列仰贊 高深先後章十餘上皆切於時務此其
 尤要者一士學有根柢至四書義理研悅至深在臺時疏請
 釐定四書朱子本義又嘗上書大學士朱軾條析駁呂一書
 疑似皆有功於學術娶陸氏居邑之神山故常往來神山卒
 遂葬之兼精制義今邑中言制義猶推一士為雄
 胡寶琮字泰舒世籍徽州父廷對官婁縣教諭遂家焉寶琮

生時父感異夢及生目光非常舉雍正元年鄉薦考授內閣
 中書入直軍機寶琮為人有膽識通洽世務大臣鄂爾泰深
 倚重之時有 旨度地塞外大學士查郎阿奏請以寶琮同
 往經土默特噶爾沁部落登醫巫閭渡松花黑龍江轉至甯
 古塔行二萬二千餘里盡得其險要阨塞乃還乾隆七年
 詔求骨鯁質樸之士如古馬周陽城者內閣以寶琮名應
 御試第一授福建道監察御史直隸江南饑初開捐納事例
 內止小京官外止丞倅佐雜九年冬戶部侍郎李元亮請自
 郎中道府游擊都司並聽納用寶琮言捐例本權宜之計不
 可復加且其所入不能補蠲賑之一二而徒輕名器傷政體
 不便轉給事中擢順天府丞十三年金川用兵大學士傅恆
 奉使經畧 敕寶琮從行贊畫凱旋 天子親斟金卮賜寶

璵酒海內榮之累遷左副都御史偃師奸民傅毓俊誣告張
 姓謀逆詞連百餘人寶璵奉命乘傳往讞一訊而伏中州人
 以為神明十七年以兵部右侍郎出撫山西尋調湖南自湖
 南而江西而河南再撫江西復調河南凡四省六任所至理
 冤獄飭戎行卹飢民黜墨吏興利除弊力行教養之政最大
 者在河南濬河梁六十七道亘二千五百七十餘里會濰淝
 淮諸水達於洪澤涸出民田數萬頃歲以有秋再撫河南定
 閩鄉馬現龍之變堵塞楊橋決口大工底定全活災民無算
 二十八年卒官年七十 贈太子太保兵部尚書 予祭葬
 謚恪靖並 允遺疏所請入籍青浦寶璵歷中外為乾隆
 初名臣性清約既貴門閭翳如不改於其舊最善騎能日行
 三四百里云子鼎蓉字兆鏡以蔭 欽賜舉人由知縣歷任

贛州府知府署吉南贛道居官廉恕所至無赫赫稱既去而
 民思之著有松溪詩文集

王昶字德甫號述庵又號蘭泉高祖懋忠名在幾社父士毅
 純德長者士毅年四十五無子禱於西湖徵蘭而生昶昶少
 隸異博學善屬文家貧作固窮賦以見志乾隆十九年第進
 士歸選班二十二年 南巡召試第一賜內閣中書入直軍
 機處歷擢刑部郎中三十三年兩淮鹽使提引事發坐言語
 不密免時緬甸未靖故大學士阿桂總督雲貴奏請以昶從
 未幾尚書溫福代阿桂為總督畱昶軍營如故三十七年小
 金川土司僧格桑作亂溫福奉 命移師征之仍奏以昶從
 阿桂再起昶又參阿桂軍事昶在軍中前後九年奏檄多出
 其手以功復職四十一年金川平擢鴻臚寺卿 賞戴花翎

仍依前軍機行走時漢人起家科甲賜花翎者惟于敏中及昶 召見詢軍營事條對甚悉 上喜命纂平定金川方畧 卽以昶充纂修官 上復問曰往者温福軍潰南路何以獲全軍昶以副將劉倬劉輝祖及奎林力戰對當是時奎林方失 上意而昶對質直不詭隨如此轉大理寺卿擢都察院右副都御史出為江西按察使時江西多盜下令嚴保甲禁惰游不一月而盜滅又嚴族祠鬪訟之禁清積案百餘件多所振起丁母喪歸服闋起為陝西按察使與平回民田五之亂以功遷雲南布政使調江西入為刑部右侍郎執法稱平屢奉 命讞獄江南湖北務在潔已奉公杜絕賄賂初昶為正卿以老乞休 上知其才輒不許五十七年主順天鄉試時和珅當國同考某以其子姓卷薦昶黜之和珅奏請覆試

欲以危法中昶而是科所取聶亮采等二百三十二人多知名士故不能難然終銜之明年昶年七十至是請益力 上鑒其誠許之 諭以歲莫寒可俟春融歸既歸因名所居曰春融堂嘉慶元年 禪受禮成入京與千叟宴四年 高宗皇帝崩昶奔赴 上垂問吏治民情 命繕寫密封以進昶退而具奏其語世莫得聞昶既罷官所餘俸率以修宗祠置義莊家無餘蓄既而分賠雲南銅鹽虧空乃盡舉田宅入官訖不足償雲南銅政繁芳為廠大小四十有八歲須京銅九省採買銅及本省鑄錢局銅無慮數百萬斤開採既久硿老鑛雜陶冶費力又以運道數改運價日貴司事日憂不繼而莫能得其顛末先是昶嘗發故籍鉤摘稽考成銅政全書五十卷持之詳且慎矣而猶以銅故賠累當事知其貧為奏

請得展限完繳事乃已昶於學無所不究名滿天下而不立門戶性樂宏獎士多依以成名當奔赴鼎湖歸適蘇州有捷辱諸生之案昶遺書學使者侃侃責之又嘗病士習骫骳氣節不立寓書侍郎秦瀛索東林志欲刻之以為多士勸論者謂風概不愧為幾社後人云卒年八十三著書多行於世無子以從弟曦之子肇和為嗣肇和生紹基皆自有傳

青浦縣志卷十八

人物二

仕績傳

徐 栩	顧 邵	陸 瑁
<small>子禕</small>	<small>次子承</small>	
陸 凱	陸 允	顧 榮
陸 暘	陸 玩	陸 納
陸 監	陸 子真	顧 凱之
陸 元感	陸 明允	朱 彥美
<small>仲達</small>		章 元澤
衛 膚敏	任 仁發	錢 溥
<small>仲達</small>		<small>弟博</small>
夏 禮	王 端	沈 祿
張 畹	顧 英	<small>子銳</small>
陳 良珊	陸 應寅	楊 樞
<small>弟良瑚</small>		

仕績傳

施用

周思兼 徐陟

楊道亨

陳懿德

顧鳳翔

陳國是

孫克宏

陳所聞

杜麟徵

陸振芬

張集

陸祖修

子元壽

王會

孟羽正

楊銓

李諫

楊繼禮

雷迅

王元瑞

何萬化

張安茂

張有光

朱袞

鄒允颺

子世裕

子汝成孫時儼

楊豫孫

顧文陞 徐充

張烈

黃廷鳳

張以誠

錢士貴

張爾嘉

張昂之

諸舜發

王元臣

曹紳

胡永祚

孫德宣

弟國維

黃朱芾

邵成楨

周吉士

葉承

王祖晉

趙頤

陸愔宗

維城

諸自毅

吳邦基

陸我嵩

陳鉞

子抱崧

子興堯 孫如金

錢珂

岑泓

杜昌丁

章繼緒

沈源

吳大勳

陳韶

金維熙

沈廷枚

張春源

朱啟華

子大鶴

諸晉

沈喬堂

王丕烈

葉本

蔡鴻業

徐恕

蔣雲師

陸祖庚

胡傳書

邵堂

許士燕

子逢豫弟 惠曾孫對

兄雲鵬從 子維禮子

次子勳裕

漢徐栩字敬卿吳由拳人居華亭谷少為獄吏執法平恕遷小黃令屬郡縣大蝗野無青草飛過小黃界不集刺史行部責栩不治栩棄官歸小黃於是有蝗刺史謝栩令還治所蝗飛去

吳顧邵字孝則雍長子少與舅陸績齊名年二十七為豫章太守下車祀先賢徐孺子墓祭滌祀非禮之祭小吏資質佳者令就學擢其先進置右職風化大行在郡五年卒官子譚承譚見文苑傳承字子直嘉禾中與舅陸瑁俱以禮徵芍陂之役拜奮威將軍後與譚俱徙交州卒

陸瑁字子璋遜弟少好學篤義四方名士就瑁游處瑁輒割少分甘與同豐約嘉禾元年徵拜議郎選曹尚書孫權欲自將伐公孫淵瑁再上疏諫權嘉其詞理端切遂不行赤烏二年卒今邑有瑁湖以瑁居之得名

陸凱字敬風遜族子初為永興諸暨長有治蹟拜建武都尉雖統軍眾手不釋書除儋耳太守遷校尉先後討朱崖零陵山賊有功封都鄉侯孫皓時歷鎮西大將軍荊州牧進封嘉興侯遷左丞相時政事多謬黎元窮困凱上疏切諫指事不飾忠懇內發皓常銜之建衡元年卒年七十二後皓竟徙凱家於建安子禕有體質器幹華覈表薦之仕至征北將軍入晉歷太子中庶子

陸允字敬宗凱之弟也始為御史尚書選曹郎太子和聞其名待以殊禮會魯王霸與和分爭允坐收下獄楚毒備至終無他辭出為交州刺史安南校尉威信大行中書丞華覈表之曰允天姿聰朗才通行潔昔歷選曹遺跡可紀還撫交州

流民歸附商旅平行民無疾疫田稼豐稔州治臨海海流秋
鹹允令蓄水民得甘食惠風橫被化感人神遂憑天威招合
遺散在州十有餘年內無粉黛附珠之妾家無文甲犀象之
珍宜在輦轂股肱王室永安元年徵爲西陵督封都亭侯天
策元年與從兄禕俱徙建安

晉顧榮字彥先祖雍吳丞相榮少出仕吳亡偕陸機兄弟入
洛時號三俊八王之亂榮數踐危亡之地恆以恭慎自勉性
好飲酒時酣時止爲韜晦最後與甘卓起兵討陳敏敏率萬
餘人濟江榮麾以羽扇其眾潰散事平還吳元帝鎮江東以
榮爲軍司加散騎常侍凡所謀畫皆以諮焉卒官贈侍中驃
騎將軍開府儀同三司諡曰元後追封公開國食邑子毘嗣
陸暕字士元瑁孫少有雅望從兄機每稱之元帝鎮江左辟

爲祭酒遷太子詹事時帝以侍中皆北士宜兼用南人暕清
貞著稱遂拜侍中明帝卽位累遷至錄尚書事加散騎常侍
帝不豫暕與王導等並受顧命成帝立拜光祿大夫卒贈侍
中諡曰穆

陸玩字士瑤暕弟器量淹雅弱冠有美名官尚書左僕射領
本州大中正蘇峻反玩與兄暕守宮城玩潛說匡術歸順以
功封興平伯累遷侍中司空玩有德望雖登公輔謙讓不敢
辟掾屬成帝以爲言久之玩所辟皆寒素有行之士也玩翼
亮累世常以宏重爲人主所貴誘納後進謙若布衣卒諡曰
康

陸納字祖言亦暕之弟也少有清操貞厲絕俗爲吳興太守
至郡不受祿徵拜左民尚書領州大中正將應召外白裝幾

船納曰私奴裝糧食來無所復須也臨發止有襪被而已餘
並封還官屢遷至尚書僕射加散騎常侍會稽王道子專政
委任羣小納望闕歎曰好家居織兒欲撞壞之卯朝士咸服
其忠亮

陸監字始明少而隱靜方直抗烈除後將軍司馬以功封西
陽亭侯

宋陸子真晉司空玩之曾孫也自玩至子真父萬載世為侍
中子真兄仲元又為侍中時人方之金張二族子真仕宋為
海陵太守時中書舍人秋當親幸家在海陵假還葬父子真
不與相聞當請發人修橋又以妨農不許彭城王義康聞而
賞之後入為中散大夫卒按子真子慧曉
遷吳故不載
顧凱之字偉仁初為郡主簿遷南蠻功曹謝晦愛其雅素彭

城王義康秉權殷劉有隙凱之不欲與殷景仁久接乃辭脚
疾自免後義康徙廢朝士多以異同受禍起凱之山陰令理
繁以約縣用無事世祖朝凱之兼用出入內外甚有聲蹟幸
臣戴法興擅權凱之不為降意蔡興宗與凱之善嫌其風節
過峻凱之曰辛昆有言孫劉不過使我不為三公耳泰始三
年卒年七十六追贈將軍常侍刺史如故謚曰簡

唐陸元感字達禮父謀道詳正殿學士善班固漢書元感生
而敏慧傳其家學官婺州龍邱丞遷建德歷陽二縣令咸有
善政

陸明允字信夫贊從子元和三年以集賢校理出為奉化令
惻惻無華視民如子屬歲大旱鄰境人相食明允推廩餼以
食餓者治行為天下第一後於龍潭壘石障水鑿引下流通

廣平湖達於江溉田數千頃人名其堰曰資國渠在奉化凡五年卒

宋朱彥美字師實初知仁和縣除通判所在稱治條呈便宜召見賜五品服除江淮荆湖兩浙等路制置發運判官先是蔡京用事罷轉般倉爲直達倉盡括藏廩粟以獻而六路漕船浮江絕淮汴汭累數月而後至吏卒冗食其中度不能償則穴沈之以險爲解或委空舟逃去歲亡十二三中都藏粟且盡彥美曰此直達之誤也乃考故事著科條蒐獮脫遺鉏治乾沒得緡錢累百萬宣和二年除京西轉運副使京西介居國右守將多怙貴不法至輦金幣署別籍儲之部使者不敢問而河防陵寢視他路爲劇每移用他司錢佐其乏以負殿免者相屬彥美乘傳詣所屬州按簿書窮株穴得百餘萬

釋逋負之在繫者量緩急輕重所宜爲施舍費出之節於是上下贍足奏課爲天下第一彥美卒年八十葬福泉山

衛膚敏字商彥宣和元年進士七年以秘書省校書郎假給事中使金不屈被羈畱靖康初返國進三官遷吏部員外郎建炎元年選衛尉少卿建議兩河諸郡宜降蠟書許以世襲使各堅守陝西山東淮南諸路並令增陴濬隍徙民入城爲清野計拜右諫議大夫上言行在頗興土木非所以示四方乞罷之膚敏在諫垣論奏內侍外戚無所回阿尋罷三年春召赴行在時帝次平江膚敏入見言及時事泣下因陳守江之策力疾扈蹕至臨安除刑部侍郎固辭未拜帝批答云朕倉卒渡江圖籍散亡深慮吏緣爲奸奏牘稽畱平讞失當以卿平日正色侃侃論議堅明據誼守節屢觸權貴必能爲朕

分別隱微章明枉直所請宜不允終吏部侍郎卒葬佘山衛
仲達初名上達字達可大觀三年登進士第改今名嘗上書
諫修三山石橋不報官至吏部尚書

元任仁發字子明世居青龍年十八舉鄉貢元兵南下平章
游某一見器之署宣慰掾招安海島有功補青龍水陸巡警
官盤龍寺叛僧某作亂仁發討平之會征交趾改海船上千
戶轉漕直沽以治水擢貳都水監凡疏導吳淞大盈烏泥開
江置閘皆仁發主其議時河決歸德鹽官海塘崩大都通惠
會通河皆不治鎮江之練湖久淤塞仁發次第為修治之其
學大抵於水利最長也又長於畫嘗奉敕畫熙春天馬二圖
稱旨累官浙東道宣慰副使致仕年七十三卒著水利書十
卷

章元澤字吉甫青龍人夢賢子也大德六年江浙行省平章
御史大夫徹里來閱濬吳淞江見元澤奇之挈之入覲使與
其二子習學蒙古文字時年十八皇慶元年授中書省宣使
以勤敏清勁為執政所委任至正二年領和甯路稅務以親
老乞南除授江浙財賦都府總管未幾遂以彰德路同知致
仕既歸築歸來堂優游自頤洪武元年卒年八十四
明夏禮字公正居唐行鎮本貫軍籍也洪武中貢太學拜監
察御史有直聲帝為開其軍伍以疏劾勳貴忤旨黜為縣丞
樂初復薦為御史出為河南按察司副使因事謫戍武清太
宗北巡再以御史召之至是禮三入臺省矣先是嘗奏減各
處均輸商稅從之其在臺建白多此類會南京開壩水溢漂
沒廬舍禮奉命閱視亟檄有司修治帝聞而善之最後按副

陝西剖決疑獄案無畱牘當以憂去陝西民數百人詣闕乞畱乃奪以還任卒於官

王端字汝善有學行永樂十五年領鄉薦宣德二年中會試副榜官淳安教諭識商輅於諸生中厯官汀州教授乞歸後居余山墓舍淳安門人應某爲代巡造廬請見思報師恩端曰我老無所需惟江南賦重君能奏輕之則私誼而亦爲公德某如教上疏報可後得減稅端兆其謀也閩里感之者知端有義之癖爭以鵝饋端令放之顰顰聲徧野名曰放鵝莊端詩詞清麗尤明法律爲時推重

錢溥字原溥號九峯少有文名正統四年進士試薔薇露詩稱旨授翰林院檢討與楊士奇論學士奇韙之居憂移書巡撫周忱論召佃煎鹽水次倉諸事多見施行天順復辟賞奪

門功溥言當時非皇太后手詔曹石二人何敢以兵入宮禁論功宜上太后尊號兵部尙書陳汝言言之於上施行焉已而知議出於溥擢溥官一級六年以侍讀學士充安南正使與禮部論移文不當與內臣同行禮又與內臣論詔敕開讀先後之序旣至安南與王爭郊迎禮王辭屈從之瀕行贖以金不受王遣陪臣入奏乃以帝命受之時稱其有體八年坐累降廣東順德縣知縣後起復原官仕至南京吏部尙書致仕卒年八十一諡文通弟博字原博正統十年進士授南刑部主事獄疫博手治善藥療之多賴以全活厯擢四川按察使中蜚語被逮事白遽卒博有才藝醫卜星麻多所通曉云張畹字茂蘭號草亭居祥澤里景泰五年進士由南京刑部主事厯擢四川按察使僉事分守建昌六衛致仕歸卒畹爲

政通敏所至有聲其在南部會旱饑獄卒有食草死者晚曰
 囚尚給衣糧卒乃平民死何罪命以囚飯煮給之決獄明恕
 平反甚眾在蜀多盜晚出入戎馬且勤且撫盜悉平未幾仙
 泉永通竈丁五千餘人盜官鹽事發眾議以兵掩之晚曰若
 是將激之生變也乃單騎詣丁所諭之曰汝等盜官物法當
 贖慎毋動自取罪戾旋誘擒其渠正其罪餘悉杖遣之事遂
 定凡衛所糧餉舊額奪於豪右者悉復之險要關堡以次修
 治番人刺馬賢刺馬能最桀黠晚至獨不敢抗數十年讎殺
 之案悉聽辦理晚在蜀數年凡軍功輒不上曰行陣之士出
 死力吾儕忍分其功其何以責後效於是人又嘉晚之能讓
 也案祥澤世謂之塘橋屬婁今仍舊志列之
 顧英字孟育居松澤里父敏孝友有傳英少負奇姿天順三

年舉鄉試授廣西同知民有兄弟爭產者各以百金為賂及
 對簿弟白兄匿財五十金英笑出賂金於庭取兄賂之半挹
 注而皆還之兩人愧服而去丁憂服除補陝西延安府同知
 署府事值歲祲先發粟而後詣大府自劾大府嘉獎焉郡多
 逋賦英請量輸輕齎折色牒上軍民兩便歸德等堡土曠民
 常苦饑英往閱視給以牛具三年而後起科民於是爭起開
 墾太監汪直北征道經延安猝欲得馬槽數千時已薄暮槽
 不可得英命坎地築之藝火燎焉英之才能濟變如此署延
 安秩滿所部上書乞畱卽真會擢雲南廣南府知府乃罷延
 安未幾致仕歸築南谿草堂賦詩自適凡二十餘年卒子從
 禮自有傳

沈祿字汝學永樂初徙京師以宛平籍中成化四年舉人任

通政司經歷祿娶張氏孝宗張后姑也后父巒興濟人封壽甯侯當選后時家貧費用多出於沈后德之一日內批超遷祿本司參議臺諫以故事爭之命遂寢久之祿以才望自致通顯累官禮部侍郎兼通政司卒贈尚書予祭葬祿儀貌偉然大廷敷奏音吐洪亮進退閒雅既貴謙抑戒家奴不得與民爭利奉使冊封晉藩謝絕饋遺人稱之弟舉亦順天舉人景泰五年進士邑泰來橋聯璧坊為祿兄弟立云子鈇字建之以蔭補官出知甯海州興學救荒有惠政民歌之曰甯海之民太守生之甯海之水太守飲之太守一去誰其嗣之陳良珊字子珍與弟良瑚孿生貌相肖人見之莫能歧視也良珊為縣學生三試皆第一宏治十二年成進士選授山東高唐州知州法令明肅人不敢以少年易之課最遷刑部主

事累官廣東布政使乞歸而良瑚亦自江西罷官歸兄弟相與嘯傲山水以高曠稱良瑚舉人官建昌通判陸應寅字虎臣居柘澤塘嘉靖七年舉人選應天府推官有冤獄久不決應寅為平反之遷廣東鹽課提舉乞歸三子從大嘉靖二十年進士官至大理評事從平隆慶二年進士浙江鹽運使從高舉人江西布政使參議諸孫亦多讀書有聞者家聲驟起人謂應寅治獄有陰德焉楊樞字運之居廣富林以舉人官福建延平府推官時有河南饑民八十餘人流至閩監司以為盜樞力爭得釋尋擢湖廣辰州府同知調漢陽均賦役置學田凡湖利之侵奪於豪右者盡舉以還民再補江西臨江攝郡事鹽驛羨餘一不以自私嘗於歲除草清理驛傳檄比成漏下四十刻矣即出具

朝服望闕稱賀以積勞卒官樞為諸生時即有志於合族終其世兄弟六人同居無間言子豫孫自有傳

施用字子中以居鍾賈山故自號八峯少為諸生與徐階並有名以選貢授江西瑞州府通判約已自持尋署建昌府督

高安稅務皆以廉慎聞卒年六十四

王會字子嘉嘉靖二十三年進士以屯田主事權杭州南新

關稅先是關吏多以脂膏自潤會無私焉再轉而為工部虞衡司郎中時俺答犯塞仇鸞方怙寵軍需兵仗皆促期嚴辦

實欲陰以覬賂會不為動而輸納如期鸞怒無以難也二十九年出知廣西桂林府鸞修前怨以他事誣逮詔獄謫紹興

府通判時閩浙奸民句致倭夷互市且為之鄉導亂由是成會廉得其首惡輒置之法最後會為瓊州兵備道州有生熟

二黎依險自阻與舶商陰相結盜發莫可追詰會下令吏卒有盜失不知狀與知狀不力捕者罪與盜等驅逐所以其半予之未幾盜息會居七寶既告歸築室長生里與後進莫是龍董其昌相倡和卒年七十有八

楊豫孫字幼殷號朋石樞之子也年十七中嘉靖二十六年進士授南京吏部考功司主事轉禮部祠祭司郎中楊繼盛

以直諫論死人以嚴嵩故率不敢引近繼盛既死獨豫孫為之經紀其喪尋提學廣東識拔多知名之士由河南布政使

參政入為太僕少卿改太常時徐階當國雅重豫孫每事必以咨之嚴世蕃之伏法蓋豫孫贊決為多豫孫以右副都御

史撫湖廣卒官年四十七娶張氏博學能文別見列女周思兼字叔夜居周家草與楊豫孫徐陟同年成進士除山

東平度州知州既至日攜一孟飯坐籃輿令鄉民以次舁行郊野盡得閭閻疾苦狀與次第蠲除之藩王府閹人縱莊奴奪民田監司杖奴斃閹迫王入奏監司且得罪巡撫檄思兼讞之王置酒欲有所屬酒罷卒不敢言思兼上讞曰奴罪當杖以王故加一等斃之不為過閹誣告罪當戍以王故未減監司由是得不坐旁郡饑民掠食所有持之急且為亂思兼為小木牌數千分立四郊令執牌就撫悉賑以錢穀事遂定以治行第一當內擢州人走闕下以請乃復留一年思兼既內擢有同年生某貌類思兼以使經平度民以為使君復來遮道謁之既而知其非是乃皆歎息而去思兼擢工部員外郎督臨清甄厥河將決身立赤日中督民築隄隄成三日而秋漲大至河不為害既出為湖廣僉事岷府宗室五人封爵

皆將軍殺人掠貨財監司不敢問思兼擒其黨悉繫之獄五人者藏利刃而見之思兼揖而捫其背曰吾為將軍百口計將軍乃欲為死耶皆沮退於是奏列其罪錮之而悉還所奪於民以丁憂歸不復出久之起廣西提學副使命下前卒徐陟字子明階之弟也歷官刑部侍郎引疾歸卒賜祭葬陟臨事剛決立朝二十年不假門第以取重值倭亂東南死事者多陟為白有司捐金建祠祀之並及婦女之殉節者案周家草屬妻

舊今仍

孟羽正字衛卿高祖暘由進士官御史有聲卒葬珠坊橋因遷居焉羽正中嘉靖二十九年進士官刑部主事諳練律書奉法惟謹繼陳情乞南改南京儀制司朝夕勤事無怠迎奉父永於官舍怡怡色養親亦忘其貧也或勸干謁謀利赧然

不答謂是薄待我者尋擢郎中聞命甫數日病卒

顧文陞字履階居七寶鎮嘉靖三十一年舉人謁選得湖南

醴陵縣知縣清介有聲以不善事上官改甯國府學教授醴

陵民惜其去泣送之百里外未幾罷歸自甯國貧甚知縣鄧

鑣時周餽之年八十餘無疾卒與文陞同舉於鄉者徐充充

本姓蔡字道充長甯縣知縣邑處萬山中頑梗難治充至改

縣治起學宮教民樹藝風教大行尋罷歸著樂陶集先是嘉

靖二十一年置青浦治青龍尋廢後萬厯復置因稱青龍為

舊青浦以舊青浦學生中舉者獨充云

楊道亨字豫甫嘉靖三十五年進士遷刑部郎擢真定知府

時畿輔戒嚴郡三面皆土城道亨出羨錢篋之而月而畢復

築滹沱廢隄以護城濠久之霖雨水大至隄且潰益置水牛

竹槌捍之露立城上為文禱神有若青羊者一日獨角白水

躍起昂首而逝水遂減民以為神又修城垣學宮以羨粟四

百石付工匠事竣遷雲南副使去巡撫李某故高拱客與有

隙且謂徐階鄉人借此劾奏下御史臺諸將作受直咸有狀

吏民環白其誣御史某上疏曰前真定守楊道亨材而廉廉

者不必盜材者亦不須朽粟事得雪復官而道亨已卒崇祀

鄉賢

楊銓字朝明號崑南居楊扇樞其從子也銓世次長於樞而

登第後豫孫十年既成進士授行人旋擢南京吏科給事中

會營卒有變兵部尚書某撫縱之銓以計擒其首惡上疏極

言其不可縱無何河池營復變毆其偏將尚書乃罷去朝廷

黷銓之先見也在南七年三遇大計皆出銓手定因條上辨

心術革餽遺抑奔競諸事並採納施行後歷廣西布政司參政時古田甫平征役未息銓孽晝調劑民不知擾會前所論劾者修舊怨搆蜚語中之遂罷歸年七十五卒

張烈字明建嘉靖三十八年進士於徐階爲內姪一日飲於朝房論時政語侵嚴嵩階爲呼飯罷酒授都水主事出行水南旺南旺所部十二泉夫甲與胥吏相蒙烈釐剔之泉源濬通水皆就治吏民畏懷之在事七月卒烈志氣凌厲不爲依阿嘗爲三守銘自策勵因自號三守子謂守直守貞守廉也階聞其卒歎曰此古所謂剛者恨未有人陶鑄之耳烈卒年三十一

陳懿德字伯求華亭人青浦籍嘉靖四十四年進士少慧八歲能詩旣成進士授編修與修世宗實錄以才敏見稱外謫通判稍遷福建延平司李平反三重辟陳邦彥楊廷玉及枉盜劉富仔有聲召爲刑部主事遷尙寶寺丞時海內州縣例以撫按舉刺爲殿最華亭縣知縣鄭岳有惠政以不善事上官不列薦懿德以爲言高拱曰如君言何撫按無薦劾也懿德曰岳無所取於民則無所奉於上安得薦劾哉且不薦則刺而岳獨否是固無可指摘也拱然之岳遂與於行取未幾懿德乞歸卒懿德有知人鑒唐文獻董其昌皆嘗識之於未遇云

李諫字格卿萬曆十六年舉人由金壇縣教諭入南京國子監再遷部郎出知四川叙州府事叙領縣十富順最饒令某以例金餽卻之民有獻鸚鵡者其鎖架以金爲之諫並卻不受歲散軍餉羨餘例得以自入惟諫悉入之官吏固請叱之

去在任又爲禁革驛傳錢糧挪借之弊以廉能稱致仕卒年七十九子四長世祺見列傳世裕字叔饒有孝行

黃廷鳳字孟威以歲貢生授雲南大理府同知定雲龍州之亂改世官爲銓授鹽井課不登臺使知其能特以委之爲削耗羨浮額三月而事辦歲課增什二三廷鳳有風義凡鄉先生嘗從之受業者沒弗克葬悉爲營葬之仕至武定府知府顧鳳翔字振羽居漕涇少壯落拓不羈游京師以傭書爲生既占籍中武科矣會邊警戒嚴中樞以東事爲急萬曆二十年會試策問及之鳳翔以前傭鈔邸報頗熟悉情形至是條對甚悉大司馬石星奇其才遂掄大魁歷官閩廣至四川總戎奢崇明之亂守禦有功又嘗督川兵赴援遼左積功甚著楊繼禮字彥履號石閭少孤依其叔父居楊扇萬曆二十年

成進士由編修歷中允諭德終侍讀掌翰林院事嘗再充會試同考官一充江西鄉試考官同郡蔡紹襄名士也以貢司教貴谿凡教官例得就所官之省應鄉試及拆卷得紹襄監臨以同鄉故難之繼禮曰此名士奈何以嫌故絀其進取於是蔡遂得中式有故人之壻爲富家所訟富家盛購古玩器以進冀繼禮助己繼禮曰我甯負生者不負死者也卒爲某壻直其事家居在官一切干謁屏絕不行子汝成官至禮部右侍郎孫時儼嘗割股愈大母疾以孝稱

張以誠字君一江西南安府知府弼四世孫也萬曆二十九年進士廷試第一授翰林院修撰丁母憂起復知起居注遷右中允以東宮久虛講席上言宮闈非進學之地內侍非勸學之官宜命皇太子出御講筵以重國本慰人心疏凡千餘

言援引得失言甚剴切轉右諭德頒詔山西事竣奉父南還父疾作晨夕顛天願以身代居喪哀毀嘔血遂卒年四十八以誠文采蔚發詩文書法並有名於時弟以誠字仲繩舉人由教諭補江西定南縣知縣未幾擢廣西桂林府通判以誠曰人生貴知足遂致仕歸其在定南嘗一至南安拜謁東海翁祠下新其廟置守僧而去卒年七十有四

陳國是字與同居珠街鎮以嘉善籍中萬曆三十二年進士授刑部主事改工部管節慎庫有劾閹人上元煙火乾沒者連及國是上曰此我家奴作奸秀才何與焉由是得不坐歷選湖南寶慶府知府生員某聘妻萬氏美江川王強委禽焉既具獄王必欲得萬賄銀凡三千萬國是於是立呼鼓吹卽堂上爲生成禮配之陞廣西按察使副使分巡桂林致仕卒

年七十子元燾有純行

雷迅初名德音字聖肅其先江西人元末來徙迅少孤力學與陳子龍交善由舉人授夔州推官後署府事居官廉介有守時寇賊充斥楚南北與夔相連迅庀亭障嚴堡驛境內肅然尋乞養歸迅能詩文亂後散佚所作杏花春雨賦最工傳於世

錢士貴字元冲華亭籍萬曆三十八年進士由江西上饒縣知縣行取擢御史時移宮紅丸挺擊三大案獄久不決上議論之會閩人魏忠賢竊政悉反三案以傾搢紳士貴遂以病告崇禎改元起本官遣督遼餉後遷南京大理寺丞告歸家居儉約而好賑貧乏濟人復起應天府丞值淮南兵荒餓殍盈路士貴力賑之全活無算最後以刑部右侍郎召遽卒子

祭葬錄一子入監

孫克宏字允執以父承恩蔭為監生選應天府都事歷署上元縣事釐正糧差著為令縣人德之擢湖北漢陽府知府會高拱修隙於徐階牽連罷歸克宏有別業在辰山四方名士以為歸客至張具令童子按新聲侑酒而自着平頭帽吹簫氣度蕭遠工篆隸又善繪事花鳥好寫笠屐小像流布人間人爭慕之卒年七十九葬山下

王元瑞字伯禎萬曆四十一年進士授兵部主事改江西泰和知縣有善政嘗築磯以禦顛水鑄鐵牛鎮之人稱謂王公隄歷官至福建道御史

張爾嘉字錫之少愛奈山之勝遂自號余峯萬曆四十年成進士由浙江東陽縣知縣行取刑部主事擢郎中當考選疏

救劉光復薦鄒元標執政憚之與尚書崔呈秀忤出為布政使參政分守紹甯台道卒官

陳所聞字無聲祖鉞好任俠倭入寇率傭奴二百人擊之頗有斬獲兵備道任環欲官之不受所聞萬曆四十七年進士授刑部主事時有太監坐移宮事繫獄諸曹郎見之必避席遜語所聞介然不為禮上啟尚書言內侍驕恣不省愆交通外人宜禁尚書勿善也未匝月改工部董陵工材用皆與商平較給直虛冒乾沒者無所容闔人憤思與為難不得間而其黨有盜竹方陶輒作私室者為所聞所發覺於是羣闔奪氣然益銜之繼復董光宗陵所聞言陵近澗道寒疑土僵大工當候春月尚書持不可會所聞丁父憂去其後積雨傾圯在工者皆得罪當所聞奔喪時號慕毀瘠未幾萬燦以劾魏

忠賢杖死燦與所聞同曹友善劾闖事實共謀之所聞謂子
 子龍曰萬公當不獨死尋聞闖人前與為難者入用事而清
 流之禍日亟遂憂憤卒年四十葬廣富林子子龍見列傳
 何萬化字宗元天啟二年進士授南京兵部主事陞郎中清
 馬政練水師有功遷禮部擢福建提學副使福甯州在海中
 航海來試患風濤萬化捐貲建館於州學使就州考州人德
 之歷官至江西湖東參政時張普薇以邪教惑眾作亂連陷
 郡邑萬化募兵措餉廣布方畧敗賊於神岡給免死牌招其
 脅從眾皆投戈星散追獲普薇斬之湖東平以疾告歸旋遷
 廣東按察使不赴卒年七十有五萬化宦橐蕭然而於親友
 不吝周給沒之日篋中止遺稿數卷人歎其賢

今從之

按明詩綜作萬化青浦人

張昂之字匪激號冷石天啟二年進士授江西廬陵縣知縣
 性介特勤恤下而不阿上執法無所假貸會魏忠賢排鄒元
 標禁偽學檄撤白鷺書院昂之不應為抗論於上官不得請
 乃大張綵樂迎所祀先賢木主入景賢堂為文以告義憤感
 發見者悚動後知四川保甯府事遽告歸築圃佘山自號六
 銷居士絕意仕進澹如也卒葬山中
 杜麟徵字仁趾蚤有英譽與陳子龍夏允彝結社雲間淬礪
 文行由縣學生成崇禎四年進士授刑部主事少從父布政
 司喬林宦游曉習吏事尚書使掌章奏時太監張彝憲總理
 部事監宣大諸鎮麟徵上疏極諫尋改兵部職方司為尚書
 熊明遇所重其請授諸將事權及定滇寇普名聲亂麟徵條
 畫為多未幾丁母憂歸卒

國朝張安茂字子美以誠第三子順治四年進士授工部都水司主事分校北闈所得皆知名士鍾陵熊伯龍文與焉出董清江浦船務詢訪利病爲國愛民厥造直隸江甯山東鳳陽各衛漕船後永著爲令繼兼七省漕儲時漕政積敝軍役互爲奸利安茂申明令甲悉革陋規八年晉員外郎擢浙江按察司僉事提督學政尋轉陝西布政司參議絳吏議事得白授西甯道夷民畏懷康熙初致仕歸安茂詞藻絕工下筆數千言又能馬上擊劍彎弧人稱文武才

諸舜發字元升居南門年十七補縣學生董其昌器之贈采芹堂額順治四年進士授戶部主事董蘆政以廉幹聞擢陝西提學僉事清白自矢以疾卒於綏德州

陸振芬字令遠居辰山順治六年進士時兩粵未定破格用

才擢授廣東惠潮道僉事隨大軍進討諸郡邑以次削平抵任後招流亡省徭役民慶更生十年四月潮州總兵郝尙久作亂圍道署振芬密遣家人齎蠟丸請兵勦賊兵至振芬爲內應尙久伏誅尋引疾歸優游四十年始卒廣東惠來張庚振芬署學政時所拔士也康熙時庚令青浦首謁振芬振芬告以地方利弊語不及私後庚爲名宦人謂振芬教之云張有光字星燦居泰來橋祖延年諸生父驊崑山籍以貢生授桐城訓導陞湖廣新甯知縣不赴卒有光苦志力學與從父淵懿互相砥礪順治十二年成進士授工部營繕司主事時崇建奉先殿有光爲監督朝夕虔謹工匠中有老弱羸病悉放還工食親自給發告祀禮成賜緞馬獎勵有加出權荊州關稅令商船隨到隨報自填流水簿以絕包攬壅

滯之弊陞都水司員外郎授山東南旺河道以奏銷案鑄秩歸徜徉山水凡二十餘年卒

王元臣字聖誠康熙九年進士器識端凝思致精密跣弛之士往往憚其繩檢歷任浙江會稽湖廣祁陽鄰縣知縣俱有實政攝桂陽暨道州一如治縣致仕後居珠街鎮與王原唐士恂互相倡和稱莫逆交孫德宣字敬旃廩監生考授吏目十歲能文中年遊幕鄂爾泰重之

張集字殿英康熙十五年進士授行人擢監察御史先是民田有五年一丈量編審之令官既借端擾民而黠胥奸吏指瀕水所漲尺寸地咸以爲漏稅若蘆蕩責令陞科歲歲查詰釐其餘乃己民以爲累集奏除之又請釐軍政嚴州縣保題通銓選壅滯及慎用學臣等事皆有關政體歷遷左僉都御

史戶部倉場侍郎舊例有簞錢一項以恤運丁久爲吏胥中飽集爲清給轉吏部左侍郎連丁內外憂服闋起補兵部左侍郎會得痰眩疾乞歸里居與諸名士南園觴詠宏獎謙挹性樸儉爲大臣自奉若寒畯好賙卹貧乏卒年六十疏聞特賜一品祭葬

朱袞字秩公先世自休甯移居珠街鎮父天瑛字漢融嘉善縣貢生有聲畿社間晚年屏跡城市以詩酒自娛袞幼承家學篝燈夜讀暑月嘗納足於甕以避蚊蟲由秀水學生成進士考取內閣中書改授江西樂平知縣樂平人生女多輒溺袞嚴禁之或廉得姓名呼其人至庭諭以天性所關何忍爲此民皆感動俗頓改徵輸有縣總都頭鄉約都約諸名爲民累袞知其弊卽禁止並革浮收陋規修學宮重建慈湖鵝湖

書院衮在樂平久吏民親之巡撫宋犖將疏薦會因漕艘追賠脚價部議降調起補山西大同時厄魯特不庭 聖祖出塞親征前後養兵大同踰半年衮供頓儲峙未嘗缺乏以巡撫新舊傾軋致被劾罷病終客館年七十

曹紳字顓書縣學生知白之後祖世臣字繩西父際飛以貢生授臨城知縣有政聲紳少英異能文與兄純弟國維並以才稱於時由貢生謁選得泰順令縣先時審丁胥吏作奸貧富不得平紳令民自實不得隱仍置舉首法察出五家連坐由是無脫漏丁增於昔三倍而銀不加三丁而當一丁之賦力易辦上官稱其能以憂歸不復出國維字四張少慧工詩康熙二十一年進士官內閣中書早歿

陸祖修字孝武父從龍見孝友傳祖修少穎敏工詩能書善

屬文康熙十八年進士選庶吉士授編修改山東道監察御史疏言尙書佛倫科爾堪等不顧公議左袒河臣竊思河工屯田請俟于成龍到京面奏後加以 乾斷從之後以言事罷祖修初尙意氣風厲敢言亦詆斥佛老及歸築老是庵於奈山結方外交晚年乃自稱老是頭陀云

鄒允颺字彥康以歲貢選寶應教諭康熙二十一年擢湖北當陽知縣邑自流寇殘破後餘孽尙踞竹房諸處軍興旁午咸取給於民較正供踰數十倍憊甚允颺至痛革其弊稅銀漕米聽民以時自封投納浮費大減時戶口逃散田委榛莽允颺勸民墾荒歸者如市夏逢龍之亂允颺先完守備復召遠近裁兵諭之曰能爲我守吾給若糧皆踴躍聽命賊旣平上元夕吏請循例諭里民張燈爲樂允颺曰張燈之弊遊蕩

一也爭鬪二也火災三也盜賊奸邪每乘間而起司土者在所宜禁可更張之耶自奉甚儉一袍歷十數年食無兼味居官七載家益落三十二年以卓異薦命以主事同知用既去任民皆繪象事之

胡永祚字令錫上海籍由選貢授陝西雒南知縣以才幹稱康熙三十年大祲賑饑有惠政時盜賊橫發永祚設法先後捕殺二十餘人境內以安雒南稱名宦

黃朱芾字奕藻居崧村祖父早世曾祖廷瑞撫之成立由縣學生以例入貢考授光祿寺典簿選廣西梧州府通判時南山賊數千人四出劫掠官兵會勦半載勢愈熾朱芾與梧州協副將某統兵深入多俘獲復以好言撫之盜眾解散歷署蒼梧縣潯州府嘗奉檄查各州縣錢穀絕不徇情盡得其實

巡撫彭鵬深契之陸鎮安知府泗州府土司爭地歷年不決事下朱芾往勘夜以銀三千兩餽峻拒之卒於官所著詩集見藝文先是孫鋹甄選皇清詩飲助搜採朱芾之力為多錢珂字以朝本姓陳鞠於外祖故姓錢珂生而穎異過目成誦年十三為縣學生每試輒冠儕偶康熙四十五年成進士選山東萊蕪知縣禁里長包納稅糧懲妖徒邪說惑眾鄰縣鹽徒孔振功等肆橫巡撫李某謂招致其魁則餘黨無能為因召振功為材官鹽徒亦患無主不相統一謬言振功來願就撫巡撫信之令振功往振功去不還部署其黨分為三十六幫幫二百人以徂徠山為巢穴橫行兗濟間州縣告急巡撫意在招撫無敢言勦捕者獨珂以獲賊報巡撫驚異因以勦撫兩說密訪於珂珂言鹽徒聚眾易翦也若縱之滋蔓咎

將誰諉莫若陽為招撫陰發勁兵以剿之旦夕可盡巡撫躓其言卒擒振功等遠近以靖雍正三年年屆七十乞休旋里與陸緯呂樾潘肇振楊陸榮等文酒往還又三年而卒

諸晉字瞻宸珠街鎮人康熙四十五年進士少讀書安亭錢

方升家為文渾灝流轉與桐城方苞為同年友以古學相磨

礪文益進任河南夏邑知縣勤宣 聖諭修飭學宮清廉自

矢懲治豪強奸民斂跡邑有還鄉書院為 至聖衣冠墓在

東漕村晉修復之以歲時致祭未幾卒於官士民醵貲歸其

喪中州人祀於名宦祠

邵成楨字樹百嶙子成楨幼有神童之目康熙六十年成進

士授廣東開建知縣縣界連廣西猺獞礦賊出掠為民害成

楨督捕嚴悉遠遁有盜案三十餘人前令已結成楨閱案牘

廉其中有冤抑乃親自訪得無辜者釋之人呼為邵青天逾

年調徐聞縣地廣民貧多逋欠到官即首務力田荒廢者墾

辟之數年賦遂充豪民張姓通鄰婦致死其夫成楨將按律

定擬張屬人關通餽銀五千兩叱去之申府屢駁執不從竟

置法闔邑稱快修葺學宮勗建義塾文風日起尋以病乞歸

成楨學問淹博賦才華麗詩出入中晚唐間及南宋范陸諸

家松郡能詩者一時未之或先也

岑泓字詩濤邑城人徙居沈巷由太學生選授山西永甯州

判總兵徐治都鎮彝陵檄泓佐戎幕辦軍需積久無稍誤又

隨征有功陞署永甯知州撫字催科寬而有法民咸感德單

騎招撫交山寇盜上官俱嘉美之會有疾告歸卒於家子大

鶴諸生以文名

沈喬堂字邦城歲貢生選六合教諭廟廡頽圯豪猾佔學田
喬堂皆言於學使者經營八載各復其舊康熙五十三年攝
縣事適大旱民饑上書巡撫張伯行得截留歲漕且分賑江
以南被災州縣旋以卓薦任山東青縣知縣又值旱災請撫
卹爲上官所挫辱憤激自經死青縣人思之祀名宦

周吉士字藹公思兼六世孫雍正二年進士由庶吉士授刑
部主事陞廣西司員外郎廣東司郎中兼提牢廳事嚴束獄
卒毋虐罪囚躬給衣糧周視羸枯冬月被敝羊裘一隸攜燈
夜巡行園土中曉鐘動始返冰索索然滿身也所讞爰書當
於法而止以念母請假歸環堵依然餽粥不繼處之晏如海
上富人喪持五百金請往護視吉士笑不應其人持金去
曉家人曰吾豈不知留金可佐衣食乎吾世守遺訓不可一

日辱先人之故其操履如此性孝友母疾露禱北辰兄弟同
居至老彌篤年六十卒學者稱爲孝潔先生

杜昌丁字望之麟徵孫也父登春山西廣昌知縣縣舊例五
年一審丁應除者不除官視爲利藪登春盡除之尋遷浙江
處州府同知卒官登春年五十九始得子大學士陳廷敬聞
之寓書曰爲廣昌除千丁乃爲杜氏增一丁也故名昌丁昌
丁少有文譽客雲貴總督蔣陳錫幕時征西藏陳錫誤餉奉
嚴旨督運赴藏以贖罪賓朋盡散昌丁獨與陳錫行往返
經年人稱其氣誼中雍正四年順天副榜以保舉授福建浦
城知縣革無名科歛勤於課士優禮賢者報最擢永春知州
建試院築衛城壩民德之立祠於壩以祀
王丕烈字述文雍正五年進士由庶吉士授編修充一統志

纂修遷御史巡視通州漕務十一年充會試同考官陞吏科給事中兩任廣韶學政識尚書莊有恭於諸生中補授福建興泉永道乾隆六年擢授福建按察使時有詔安民人聚黨煽動及漳浦奸民戕害縣令兩大案丕烈至甫一月盡獲渠魁閩地多高原雨澤愆期田禾易稿丕烈為立補種雜糧及通融平糶之法奏請頒行七年調河南按察使禁重刑嚴固戶開築溝渠隄堰又酌定小鹽禁例以裨窮黎民胥賴之十年丁內艱歸旋卒於家長子芳乾隆九年舉人荆溪縣訓導葉承字子敬能書畫以曹一士顧成天為師雍正五年進士授浙江常山知縣常山四境皆山爭經界者無虛日且多盜又當江西閩廣孔道疲於迎送承不憚勞瘁事皆辦治總督李衛見其短視謂於臨民非宜奏改教職補貴池教諭素嗜

學課諸生孳孳不倦罷歸後設教里中多所成就年七十九而終子抱崧以詩賦才名著乙酉南巡召試第二等早卒章繼緒字紹庭華亭人青浦籍雍正五年進士歷任山東章邱棲霞利津知縣官利津時建義學七處并仿松江府教授陸在新法設引年會凡諸生年六十以上者給銀六兩七十倍之八十又倍之著紹庭詩鈔長洲彭啟豐序子德彪字仁牧工詩遷居廣東

葉本字敷南雍正七年以監生為禮部尚書任蘭枝薦發往河工大學士嵇曾筠委築高家堰叙功一等以沿河州縣補用初署當塗授盱眙時泗六滁諸州鹽徒私販中有貧民誤為所誘本奉檄按治開釋甚眾新盱邑文廟建書院於玻璃泉乾隆二年陞泗州知州水災勘賑積勞成疾總督尹繼善

以聞奉 旨授鳳陽府知府旋調河南衛輝皆以廉能著後以失察屬員虧空降山安河務同知丁外艱歸值歲祿施粥平糶收育遺孩鄉黨頌之

王祖晉字笙客華亭人考授州判雍正八年以保舉發往南河歷著勞績議叙得靈壁知縣乾隆六年擢六安知州旋補河南汝州擢授衛輝知府在郡四年復崇本書院濬孟姜河勸藝水田理冤獄絕請託嚴舉劾歸葺祖遺余山莊居之題曰知止興至輒成篇章所著見藝文卒於子興堯河北署中年七十一興堯字澄宇循例授通判大吏薦授東昌下河通判遷兗州泇河總河張師載廉其勤幹擢同知旋授陝西西安府未期年復以講習河務特簡山東運河道時工部方議大挑運河 詔大學士劉統勳覆視興堯謂蓄諸水嚴啟

閉禁偏漕則不勞民不糜帑無淺阻之虞統勳聽其言事乃不擾以母年老乞養歸葺皆山閣擅園林之勝亦耽吟詠孫如金字式二以議叙通判歷官山東兗沂曹濟道調河北道護河隄之將決者叙功加按察使銜卒官

沈湖字鏡涵居小蒸精制義真草隸篆各擅能事尚書沈德潛極重之雍正十年舉人乾隆十三年進士以一目眇需次補潁州教授勗諸生敦倫修行文宗先正士多遵焉歸田後廣西巡撫李錫秦聘赴黔中主講秀峰書院旋歸授徒評選時藝風行遠近先于湖者有陳源發字岷山由福泉縣政府學生雍正六年拔貢 廷試列一等考教習復拔第一選授黟縣教諭在任七年黜浮崇實士風一變繼授蒙城縣教諭以疾終官署

蔡鴻業字廣勤先世由閩遷華亭遂為華亭人登乾隆十三年進士授刑部主事晉員外郎中持法稱平於案情律意悉心探究決疑伸枉如神明擢廣東糧道未一年召署刑部侍郎蓋上素知鴻業治獄明允且資格無出其右故有是命旋授副都御史仍攝刑部事補授右侍郎會以粵省糧驛事被議詞連前官與梁國治同赴粵就覈事白吏議褫職特恩授鞏秦階道踰年擢甘肅按察使尋升布政使以母憂歸年六十三卒鴻業歷官中外二十餘年老屋蕭然不異儒素晚葺數椽於皇甫林陳子龍墓在其地鴻業時護視之自號林西老人

趙頤字百期生而穎異至性過人五歲遭祖母喪能成禮年十三以背誦十三經補縣學生乾隆十年成進士即用知縣

分發江西署上高縣事上高俗素強悍頤繩以法境內肅然逾年授分宜知縣判決如流暇日延諸生講道勤學巡撫晏斯盛稱為愛民如子愛才如命居二載以事去職卒年四十九有六民德之祀袁州名宦

莊恭字儼望先世郡西人父斌始遷居邑城恭循謹讀書中乾隆九年舉人就教職十六年選徽州績谿教諭恆以造就人才為急修績谿志表揚靡失二十年歲饑捐俸設廠賑粥知府何達善嘉之將薦諸上恭力辭後補建平教諭以疾歸平居持正有惠閭里咸稱善人方枝映字生蕃亦邑舉人也後於恭任荆溪訓導卒官有賢名廖景文遷青與枝映鄰倡和相得推為良友

徐恕字心如父葵縣學生居蔣浦恕生一歲母亡葵撫之五

歲能識字年十六補縣學生乾隆十六年成進士授甯海知縣調平陽四人文闈所拔悉兩浙知名士擢太常寺博士遷宗人府主事充玉牒館纂修典試河南廣西遷吏部稽勳司員外郎授湖州府知府調杭州晉浙江糧道蕭山被水親勘發賑窮黎賴以全活收瘞浮棺數千立義塚並置田以供歲祭轉鹽道尋陞按察使有飛蝗自海外入錢塘恕馳至海濱教民夫以掘溝捕掩之法能捕獲者計升斗易以錢米凡兩晝夜蝗盡旋丁內艱起署山東布政使值歲旱恕布衣草屨步禱泰山甘雨如注百姓遮道懽呼歲大稔調署浙江布政使四十四年仍署山東布政使冬十二月十七日夜署中火恕入內取印被焦灼卒事聞 上憫之贈副都御史蔭一子逢豫為主事逢豫字簪齋由兵部武選司郎中授大順廣兵

備道以清謹稱濟荒禦水皆有方畧秩滿入都引見 上詢及家世逢豫以父恕歷官奏對 仁宗霽顏溫諭曰汝當學汝父為官逢豫免冠叩首泣誌之旋陞任長蘆鹽運使嗟價日平滯課咸起嘉慶十三年春 仁宗東巡駐柳墅行宮召見者三 上嘉之賞賜逾例卒於任弟惠優貢生考補正黃旗教習以知縣捐陞主事後加員外郎工書松郡修葺學宮建育嬰堂皆創率捐資成之曾孫封歷任鎮海富陽太平縣丞署浙江秀水知縣有循聲

陸惇宗字望之原名文洋振芬曾孫也性聰敏工楷隸於地理尤精中乾隆十八年副榜補覺羅官學教習二十一年舉順天鄉試選福建平和知縣地濱海民椎埋掘冢尤喜械鬪惇宗寬猛兼濟俗漸戢營兵聚博恣為不法愷宗過瑄谿獲

之方訊問同伍竄取之捕黨與置諸法兵弁肅然尋調閩縣時歲饑米貴請平糴二萬餘石民以安知府某嘗至臥內見室無長物因謂曰官舍竟同僧舍耶歎息去以母老乞養歸邑令楊卓請修縣志分纂水利田賦職官科目考古援今同人稱其精密四十九年遭母喪毀卒

吳大勳字建猷乾隆二十一年舉人由功臣館議叙選江西信豐知縣俗健訟牘多告爭墳山者且惑形家言葬數年猶發冢視骸骨卜休咎大勳嚴禁風始息調新建會兩廣總督李待堯過南昌前驅索供億大勳杖之李逐其僕奇大勳尋以卓薦擢尋甸知州陞麗江知府坐公事鐫級起補順天府南路同知歲大饑請發賑總督梁肯堂以格於成例不許大勳懷印綬詣戟門固請不已梁怒拂衣起大勳俟於門日且

晡幕府食以飯大呼曰百姓饑且斃大勳忍獨飽平語聞梁出復陳民困狀聲淚俱下梁心動許之大勳頓首謝乞速奏賑遂普後復絀吏議改四川保甯府同知又改知酉陽州州皆童山無良田久旱澤苦焦饑什駢望大勳請撥秀山存贖軍米平糴并免徵津貼銀民賴以生明年復旱露頂祈雨三日夜果雨秋蝗設八蜡神位於龍王廟爲文祭之蟲不爲災治行稱第一卒年七十三

蔣雲師字瑞應兄雲鵬字程遠乾隆二十七年順天舉人大挑二等選授繁昌縣訓導雲師少從同里陳穎傳受業舅氏王昶館吳門朱氏雲師復往從之獲交吳泰來曹仁虎錢大昕聞見日廣與兄雲鵬同榜中式以四庫館膳錄補直隸新城知縣縣值衝途遞解人犯往來不絕藉用民車按村輪派

最爲民累雲師捐資備車僱夫定爲遞解人犯官車遂免派旋陸宛平縣抵任三月清積案四百餘五十三年授西路同知任三年有譖於上官者以迂緩奏令原品休致褚廷璋謂之曰迂不趨時緩不病民當今躁競者之良藥皆古循吏所尙也又何病焉貧不能歸主講金臺書院旅歿於京師從子維澧字源長乾隆四十八年中順天副榜就職直隸州判分發山西補絳州判時大同饑維澧協辦賑務復捐廉俸施粥掩骼繼攝孟縣授陽曲縣知縣調臨汾皆以才幹稱 特簡廣東連州知州上官舉薦引 見記名以知府用尋丁憂歸病卒子維城字仲新俊潔自好縣學生

陳韶字九儀居南門由館學生議叙理問攝台州同知會臺匪林爽文滋事奉檄帶台兵五百名赴閩師行不擾還攝寶浙局乞病再起署烏鎮同知懲治土豪申理冤獄復社學出俸百金存質庫取息以佐用王昶記之稱其清勤有循聲改署紹興府同知卒年五十五韶少以花南詩得名因號花南善畫山水曾自繪歷游名勝圖冊百幅

陸祖庚字鵬年少從黃炤嚴堦遊有文譽入資補福建浦城縣丞明習吏事以卓異調臺灣鳳山縣丞甫蒞任姦民王教滋事募驍勇竭力堵禦俟軍集擐甲出擊一舉除首逆事平請上官撫卹生熟番嚴查海盜諸禁各見施行惠潮漳泉諸郡貿易者始畏法擢知南平縣爬搜積弊整頓窳惰不期月而政成丁父憂歸年六十卒家居恆布衣徒步不立崖岸性伉直不能容人過後進憚之家本素封宦遊廿年產無存者閩人至今稱清白吏云

諸自穀字詒孫幼失怙恃寄養於姊壻張綿如家年十八補諸生乾隆四十二年拔貢選甯國訓導捐俸修學宮建節義祠設西津書院嘉慶四年陞義烏令六年大水辦賑民賴全活修邑乘建六賢祠尋調蘭谿卒其去義烏也赴省保畱者數百人既各作詩歌以送之

金維熙字燮臣縣學生入監應順天鄉試挑選四庫館謄錄考取吏目加捐縣丞籤分四川乾隆五十五年補授榮縣丞王師征廓爾喀總督孫士毅駐劄打箭爐維熙理臺務有功題署屏山知縣屏山古楚國地夷獠雜處號稱難治維熙撫治有德政猥夷信服嘉慶元年夷與漢人爭界騷動邊境維熙命疊石隘口嚴守之猥猥望而却走猥猥有傭于民者維熙命使前導匹馬入山酋長聞維熙至大驚出迎勞以酒

肉維熙責以妄動之罪酋長俯首謝求立石以定界維熙許之猥猥羅拜道傍而還邑乃無恐後屏山人繪其像勒碑於龍湖書院四年往來鐵采天臺燈竿失足跌損膝蓋告歸年六十卒子垣廩貢生工書名於時

胡傳書字思荻寶瓊孫由廣東海陽丞歷官新安知縣以事去任嘉慶二年從軍粵西蕨事捐復原官授山東樂昌令調掖縣遷東昌同知卒於任傳書為人彊力有執所至以能稱長子勳堯見孝友傳次子勳裕字問庵嘉慶六年舉人考取謄錄選廣東始興知縣始興多盜嚴緝捕之法四境肅清有比鄰以細故訟者監生某私餽洋銀八百圓求袒護集兩造諭之和好召某訶叱之令負所餽從大門出歎曰非欲沽清名使百姓知之以絕吏胥弊耳莅任七載民咸愛戴調澄

海決獄稱神并息沙田械鬪之費居一年復宰始興旋署廣州通判因事鑄秩歸勳裕工書畫與兄勳堯俱有名於時吳邦基字履德大勳子乾隆六十年進士授工部屯田司主事嘉慶四年補虞衡司陞營繕司員外丁艱服闋仍原職陞都水司郎中監督寶泉局補授徽州府知府道光元年引疾歸丁亥六月卒年七十四監督寶泉局時值教匪林清之變坐堂上見僕從皆倚牆耳語呼問之云賊入城城中已大亂矣有勸之歸者邦基曰吾死於此職也危坐達旦明日聞事平乃歸見喋血滿街輿夫之履如屢其詩文初宗韓晚乃出入杜蘇於國朝獨推朱彝尊云

沈廷枚字惟吉海從子也拔貢生以覺羅教習授江西安仁知縣母老告近改安徽旌德縣值歲旱禱雨即應嘉慶二十

五年調蒙城縣洪澤水溢竭誠賑撫全活甚眾兩邑均有生祠巡撫姚祖同察其清介特以卓薦道光元年丁母憂歸三年水災佐知縣李宗穎辦賑盡力服闋仍補安仁縣知府方傳穆屢委審案稱其不善詞令而善決疑獄十一年夏大水平糶積穀民以安靖逾年告病歸前後服官二十年所至有循聲卒年八十一

邵堂字尊如珠街鎮人少負瑰才侍郎王昶奇賞之年二十餘游吳門從張問陶王芑孫吳慈鶴游慈鶴常曰邵君他日當以政事顯不獨文章也嘉慶丙子丁丑連捷成進士試宰於豫初攝林慮甫視事發奸摘伏如神明雖老吏不敢欺旋補汜水勤撫字行保甲嚴守望修閘壩堰渠以備水潦嘗檄赴大工課薪草督畚鍤事聞輒辦上官獎其能薦授五品服

省有疑獄輒檄堂廉按之動得其情公餘猶手一編哦舊業不廢詩豔冶新雋大類張承吉陸龜蒙論議所及都有真意灑氣流注其間文稱是生平嗜古文奇字其所論著蝌文魚篆駱驛行間雖甚淹邃莫能盡知刻集時蔡逸畧易以今體凡數千言

陸我嵩字芳玖嘉慶十五年舉人父廩貢生企照宿儒也教之嚴學必實踐我嵩應禮部試企照寄語云京師天下英才所聚有名譽日至而悔吝日生者舉漢書王丹李充二傳令時省焉我嵩道光二年成進士補福建壽甯知縣擢雲霄同知補邵武府同知加知府銜前後在閩十三年歷署汀州延平邵武府福州海防廳興化通判莆田閩縣事廉明勤惠政以興水利為急莆田有木蘭陂石隄仿浙海魚鱗石塘成法

兼築石壩三疏溝百七十有八設斗門涵洞俾資蓄洩皆躬執度指授程式期月始畢計復腴田二十二萬五千餘畝我嵩熟於商功幕積之術先事度形勢覈經費鉤稽微密毫芒無舛既定為圖論發明之有浮冒者一見輒指其謬雖老胥持籌覆按終不能越一時共驚為神然御下寬易役夫聞其至趨工恐後故不煩督責而事集有大興作必以屬焉其救閩縣荒力籌義倉捕洋盜禁寶峰寺僧花會除延汀漳會匪聯保甲興復擢英越山書院立福州義塾皆以實心行之嘗謂在我用一分心力於人自有一分利益居憂時主講上海敬業書院以身為教夙好學舟輿所詣恆以圖籍自隨所著見藝文卒年五十

張春源字嘉樹諸生少孤貧僦居外岡為黃渡邨塾師喜讀

律不為章句學里中有識者醵金贈之乃出遊嘉定錢坫遇之京邸叩其所學薦諸巡撫楊護委理部案平反大獄練才達識當事爭相折節例授湖南通判捐陞郴州知州時平遠州莠民滋事春源隨總督慶保治之止懲首事盡解脅從平江縣開漕阻考大吏議請兵捕春源單騎往諭投出三十餘人事遂定旋署長沙知府以疾乞歸

許士杰字子偉白鶴江鎮人縣廩生素性介直道光時例授雲南宜良知縣歷署太和縣廣西州民頌惠政二十三年蒙化廳鄉民與回教民爭市有司不察遽拘禁城中教民四鄉教民聚眾數萬蜂擁據城上官急集提鎮標兵防剿知士杰能乃檄至營商進取士杰請先赴城招諭皆謂危不可士杰久官迤西素有恩信慨然率僕從數人往教匪有在城外築

砦者見之曰宜良縣許君來我屬得生矣急報城者城者開門納士杰眾皆遵士杰諭解散蒙化不血刃而復士杰力也旋署蒙化廳事蒙化民設位祝焉繼署元江直隸州卒官得同寅資助喪始歸

陳鉞字煥文父畹兄麟自有傳鉞幼聰慧六歲遭父喪哀痛成禮體弱多病讀書無間寒暑道光二十年舉人選授無為州學正以敦品力學勵諸生執贄甚眾同時奉賢進士朱恆秉鐸廬州從遊極盛皖人稱名教官者咸推朱陳咸豐三年賊逼州城鉞與諸生晝夜巡防盡瘁卒

朱啟華字藹堂歲貢生精專經學於詩尤殫力著有詩說稱于時同治時選任句容縣訓導時金陵初復流離未歸啟華招徠庠士訓迪有方以勤職卒於任

儒術傳

陸績

顧野王

顧謙

衛湜

衛富益

陸鵬南

周之翰

章弼

曹宗儒

穆良

焦震

張璞

俞永

子悅孫琳

張時泰

蔡汝賢

徐三重

子頑秩頑

呂克孝

父錦

王喆生

屠王畿

單周傳席

徐貞永

陸元炳

張德純

陳鑑

陸緯

葉誠

趙太璞

張鳳孫

金襄

方玉臺

張國埈

方祖範

葉德源

倪倬

子皋補

陳淵泰

張渭

許錫祺

漢陸績字公紀康子康見列傳績年六歲於九江見袁術懷橘遺母術奇其孝及長容貌雄壯博學多識星厯算數無不該覽虞翻龐統舊齒名德皆與績友善孫權辟為奏曹掾以直道見憚出為鬱林太守加偏將軍給兵二千人績既有疴疾又意在儒雅雖有軍旅著述不廢作渾天圖註易釋元皆傳於世年三十二卒豫知亡日自為辭稱有漢志士吳郡陸績權時蓋未稱王也其自鬱林罷歸輕裝舟不可越海取石為重人號之曰廉石

陳顧野王字希馮祖子喬父烜仕梁皆以儒術知名野王好學能文徧觀經史精記默識天文地理著龜占候蟲篆奇字無所不通又善丹青入陳後官黃門侍郎光祿卿卒贈秘書

監右衛將軍野王著書甚富皆行於世而玉篇最顯

唐顧謙字自修風神朗秀質性端敏舉明經三禮科貫穿精

義獨行不合於朝士魏帥何某表謙高才乃拜貝州宗城令

尋棄歸隱居北平鄉崧子里名流高其風操咸就見焉

宋衛湜字正叔涇之弟也邃深經術除太府寺丞將作少監

皆不赴撰禮記集說一百六十卷魏了翁叙之推許甚至寶

慶三年上於朝終朝散大夫直寶謨閣知袁州學者稱櫟齋

先生

衛富益自號耕讀居士涇之後也宋亡絕意仕進設壇祭文

天祥陸秀夫張世傑哭之極哀嘗從金履祥許謙受學謙甚

器之謙卒為之制服教授鄉里創白社書院於石人涇之陽

春秋社日祀先聖畢輒與布衣友賦詩講道澹然有忘世之

志未幾入浙湖之金蓋山一意著書後還故里足跡不履城

市或有乞詩文者謝之臨終悉焚所著曰吾志晦迹安用名

為卒年九十有六門人私謚曰正節先生

元陸鵬南號象翁通毛詩不仕文章奧健與陸霆龍齊名人

稱二陸

周之翰字申甫幼穎悟博究羣書尤潛心易學著有乾坤闔

闢天地生成陰陽變化山川流峙諸圖從學者如市自號易

癡晚遭兵隱居神山又稱細林山人之翰長身鶴立性情易

直講授不倦以壽終

章弼字拱宸伯顏長子未十歲能書榜署長益多文識度清

遠篤志經史宋時孔宅舊有書院元初廢弼重修飾之迎師

以淑鄉之良俊立學規十六則開導後學甚懇至與蔡廷秀

義塾規同重焉又有釋菜先聖文及祭祀約言皆無愧儒者
 明曹宗儒字元博父慶孫見文苑傳宗儒博學能文章洪武
 初任華亭教諭勤於造士嘗以事至京師帝異之諭禮部曰
 教官所以作養生徒為國儲才有司委以公務使不得盡心
 教訓甚非崇儒重道之意其禁止之著春秋叙事本末楊維
 禎序之子衡字士望精敏好學善真草書官至工科給事中
 穆良集賢鄉人從李處仁受春秋建文元年舉人授太原府
 訓導俗朴魯不尚文藝良隨時獎勸學士漸化之同郡姜以
 禮俞永欲具疏薦之峻謝而止歷霸州蕭山教諭一以士習
 人心為本歷官三十年自奉清約語及勢利輒感額曰利以
 和義若罔上腴下害不及身必其子孫人皆服其言年踰八
 十卒

焦震字伯誠廣富林人潔身修行事母至孝治五經悉通奧
 義鄉會試年主者聘佐考校俱辭疾不赴隱居教授及門多
 達者正統三年春有瑞竹生於其家凡二本異幹同梢七年
 復發一本巡撫周忱作詩紀其事
 張璞字廷采七寶人少嗜學博通典籍書畫皆有名尤邃於
 易正統中貢入太學祭酒陳敬字重其人授陳州學正興教
 補敝風采蔚然州向無登第者至是一歲舉二人璞有篤行
 侍大父痲疾久而不怠自應天還同舟一人病亟眾欲棄之
 璞曰如此死矣因僦舟載之贈金資其行客既去終不問其
 姓名也撰易髓一卷及淮陽志若干卷
 俞永字嘉言原名允父顯見孝友傳永力耕讀書通春秋三
 傳工詩文洪武甲戌第進士授楚王府紀善輔導盡心出宰

魯山創明理學士風翕然吏民畏服永樂初徵修國史歷禮部主事儀制司員外郎以事謫判長沙尋告歸越七年卒永方孝孺門人孝孺殉難幼子德宗方九歲航海投永永收匿之冒俞姓妻以養女後俞宗懼禍及更俞為余萬歷己酉提學御史楊庭筠廉其事德宗得復姓郡人建正學祠祀孝孺因以允配焉子悅能詩孫琳舉人選江西臨江府推官廉平有聲

張時泰字吉甫居唐行鎮少不知書年二十八隨父輸賦見縣官威儀感激志學里無經師因詣郡從學數載補諸生宏治間以貢選秀水訓導毀淫祠課弟子以正居喪盡禮捐產賑急不以貧辭著宋元綱目廣義工詩與錢福曹時中倡和為多

蔡汝賢字用卿隆慶二年進士授大名府推官佐治河有功擢兵科給事中疏劾勳戚無顧忌朝議以王守仁從祀孔子廟庭汝賢上崇正學祀真儒疏乞以羅從彥李侗從祀又請復青浦縣治議皆施行出為四川參議累任廣東布政遷右副都御史巡撫廣西晉南京兵部侍郎致仕歸卒年七十有五汝賢在官清介未第時喪偶終身不復娶待人接物道氣穆然

徐三重字伯同居七寶鎮祖壽長者好施父沛少從周思兼游砥礪文行良醫濟人三重登萬歷二十年進士授刑部主事時政尚綜覈三重獨持平恕尚書嚴清使掌封事每有疑獄必咨決焉未幾乞養歸三重操行端潔門庭肅穆少博洽好為詩文既歸一切棄去潛心性理以朱子為宗自號崇晦

老人子禎秩內行孝謹次子禎稷由進士歷官刑部員外郎出知夔州終溫處道初三重讞事欲出一死罪弗得及禎稷官刑部切誠之亦以平允稱其出守也三重作政要一十四條示之清門廉吏人比之胡威父子云秩子銘敬舉人官句容教諭稷子銘常見隱逸傳

呂克孝字公原父錦官金華通判稱循良克孝舉萬曆二十五年鄉試第一主考朱國祚葉向高甚器之選如皋教諭訓士先德行而後文藝纂輯邑乘簡核有法遷國子監助教工部司務鄒元標馮從吾高攀龍建首善書院講學克孝與周宗建董其役乾魚脫粟比墁工匠石無加味也擢營繕司郎中未幾朱童蒙倪文煥上疏詆為偽學元標等皆罷克孝已出權荆關稅魏忠賢怒之坐以侵冒罷歸著書自娛卒年六

十有六

國朝王喆生字醇叔居珠街鎮少孤母朱氏撫之成立師事崑山朱用純讀性理書憬然有悟因置日記以自省康熙十六年舉順天鄉試第一越五年成進士授編修二十四年充會試同考官得孫勳以下八人皆知名士尋乞養歸讀書敦行巡撫趙士麟宋犖皆推重之著懿言日錄續錄張伯行稱其精深博大云

屠王畿字觀侯陸清獻隴其弟子初名顯入縣學後改今名清獻館張堰之次年王畿父武虬率之從學臨去訪所交於清獻清獻以周梁應之遂延梁主其家講究經學後清獻以王畿氣靜質實以仲弟肇熊女妻之單周傳佚其字亦清獻弟子四書大全之刻周傳與於校勘又有席永恂兄弟清獻

客授珠街鎮四年二人從之問學甚勤席吳縣籍先世商於珠里遂為珠里人

徐貞永字介裕縣學生少而嗜學研精經史尤邃於性理沈文恪公荃亟稱之郡城徐氏富藏書貞永館其家三年盡讀之學益進著五經辨正春秋公穀傳辨正若干卷康熙二十八年上於朝

陸元炳字曙予邑增生沈巷人好古能文沈靜誠樸嘗言文不由古非文也文不本行非文也居家盡禮教授生徒不事嚴毅使人自化晚年學益邃探索宋儒語錄反躬實踐尤兢兢於君子小人之辨又嘗訓其子曰人口過與意惡二者俱難制吾自省惟口過可免耳卒年六十有四王希伊稱為郭泰黃憲之亞同里有葛桂發者福泉諸生為人師嚴立課程

悉心誘掖至今人稱師範之嚴猶曰葛先生也

張德純字能一先世本姓郝晉大夫郝張之後困明代賦役改張姓由崑山遷青浦康熙三十九年進士授中書改常山令會歲浚饑德純於蠲賑外復請得米數千石分置城鄉平糶料計貧民口數貸食約秋熟還倉先後存活甚眾邑賦地丁分納丁缺輒攤之貧戶德純請併丁於地弊遂絕江西福建客民春來佃麻秋而棄去土著苦其滋擾德純設長約束之人不敢犯以失察旗人解任少工詩晚歲專力治經儀禮周禮皆有註釋其論易辭變象占皆引而歸諸人事深思實驗蘄於不詭聖人之意孫鳳孫自有傳

陳鑑字其言秀水籍與金澤周易有連遂卜居焉雍正元年舉鄉試不仕潛心濂洛之學為長洲汪份高弟份著四書大

全屬鑑參訂歷十二年須髮盡白

陸緯字星聚縣學廩生工詩古文晚築尋樂山房于西余研精性理諸書尤得力於薛瑄讀書錄丹黃標識二十餘年嘗語子晟秉樞曰其中有切於日用者隻句單辭亦親切有味姑節錄之以示汝曹於是楷法手書或黏齋壁或貽親故雖片牋尺幘書數十過孜孜不倦自號嫺軒蓋取錄中仁是嫺物語也年六十六卒後晟會萃遺筆輯為讀書錄鈔晟字臨潭以舉人官宿州教諭晟字扶桑貢生秉樞縣學生並以文稱而晟學尤純

葉誠初名星昌字少文入學後為學使者所擯改今名補婁

庠生舉雍正四年鄉試誠服膺理學著原佛論破幽論凡若干篇傳於時

趙太璞字醇完天延子諸生少通爾雅訓詁王原深器之與楊陸榮友善陸榮著作多太璞與參定太璞嘗以正字通多訛脫手校疏證之形聲精確稱於時時縣析為福泉福泉令戴仁行重太璞行誼顏其居曰老成懿範時時造訪民間疾苦年九十卒

張鳳孫字少儀德純孫也父之瑣以貢官印江縣知縣鳳孫少英敏母顧欲覘其志詢以先儒願學何人應聲曰學韓昌黎弱冠父緣事被逮走京師刺血書請代時有三子之目謂孝子君子才子云雍正十年中順天副榜乾隆元年舉博學鴻詞尋舉經學甲子復中副榜充正黃旗教習授直隸州州判洵歷福建邵武府雲南糧道後選四川永甯道以年老補刑部郎中敷歷中外四十年廉能詳慎所至有異稱居家恭

儒術傳
三
儉訓子弟以忠孝家世傳經德純著孔門易緒鳳孫嘗手寫

數過卒年七十八子慶曾懷遠縣知縣

金襄字式玉嘉定籍弱冠與兄鈺同工文婁東院長毛詠以

雙金目之乾隆三十三年舉人四十六年進士以知縣改江

甯府教授約束諸生以道督飭義學勦舉郵廢事協葺中山

遺墅為藩司浦奉茲知府李堯棟所倚重性介不泛交時桐

城姚鼐嘉善浦銑各主講席在郡招同寢處相究切性命之

旨案頭惟置大全集近思錄諸書丁繼母憂歸遷居陸家圩

服闋補鳳陽府教授辭主講平江敬業兩書院以終

方玉臺字廷瑞府增生殫心經史樂道安貧廖景文令合肥

延之於署興學救荒玉臺襄助甚力既歸課徒授經稱老宿

王希伊司縣學敦請訓其子出其大父懋竝經史疑屬玉臺

編校閱三年而畢除夕微雪希伊造之見玉臺門庭闐寂燈

光熒然擁青氈研朱點讀周易希伊笑曰誠齋窮有趣誠齋

玉臺之號也

張國埈字惠周宋明公載二十世孫恩貢生居七匯少從沈
求立游有文名教授珠里最久慕陸清獻之遺風為學務躬
行貫串儒先語錄而不欲以著述名惟學庸講義若干卷寫
本今存

紫陽書院能以師道自任石韞玉潘世恩皆以古敦官目之
 尋丁母憂歸病卒子皋補皋舉人溧陽訓導敦文行制舉義
 最有名于表彰節孝為之尤力補諸生有異才早卒倬志復
 古禮家法修整俗傳人亡後肯回其神禽身人面張雙翼攜
 亡者歸亡者之家當如期具酒食延僧道誦經迎之否則有
 禍習久相沿莫知其非禮倪氏獨守禮不行家無恙因詫肯
 神為補所食云

陳淵泰字上之性懇篤讀書能強記幼承世父琮父瓏緒論
 好古敦行治經初學虞氏易雜治他經於三禮尤勤珠溪創
 設書院延淵泰為院長教後進斷斷然思有以澤之於古居
 鄉力持名義里中有傷敗風俗之事輒白有司嚴禁之所著
 佚於亂淵泰道光十二年舉人蔡自申字時升淵泰同年舉

人也性雅淡讀書外無他好家貧無宿春不問亦不知與談
 經史終日娓娓至寢食俱忘治三禮得其原委於鄭注孔疏
 尤稱淵博

張渭字濱甫邑廩生居東北鄉張家邨謹內行以經義教授
 終其身渭讀書日有劄記鄉闈屢荐不遇意氣泊然咸豐己
 未學使者臨郡故事學使釋奠畢諸生以次講書渭講君子
 不重章詳明剴切入學觀者聳聽學使者亟賞之晚築亦樂
 軒弦誦其中語不及外務里有凌競事遇渭輒意消冰釋時
 稱為篤行君子著有四書滙參商若干卷

許錫祺字莘甫縣學生晚號淞濱學人自少通敏有志及冠
 泛濫百家欲以古文自鳴繼交崑山吳以辰服其文雅潔讓
 之遂輟不為發憤蒐宋元及國朝諸儒遺書讀之見有為學

儒術傳
之方輒力行之於明儒陳白沙集服膺甚久晚乃一宗朱子
行思坐誦疑悟相尋專以默識爲務嘗謂四書會歸於中庸
五經會歸於易其讀書札記若干卷大抵皆論學之言由體
認得之也錫祺爲學韜晦聲華凡三十年漸有從之問業者
同治紀元邑中欲舉錫祺應孝廉方正科力辭不果舉光緒
二年卒年五十有六

青浦縣志卷十九

人物三

文苑傳

顧譚

陸雲

呂益柔

曹永

王文澤

邵亨貞

錢驥

陸潤玉

朱應祥

弟昫

子炳

子默

子克穎

蔡祖

陸喜

顧愿

衛謙

章伯顏

任暉

王士顯

朱熙

曹泰

高企

子輔

陸機

顧憲之

曹慶孫

陸侗

杜際

管訥

沈度

曹時中

徐獻忠

從弟時信

姚鵬

袁福徵 子之熊之明 張之象 子雲門孫齊顏 文苑傳

沈邶 陳一鳴 顧從義 王圻 孫昌會

戚韶 莫是龍 彭汝讓 子維曦 顧從義

張德讓 章憲文 王朝英 唐汝諤 洪都

潘可大 子哀駿 王朝英 周紹元 弟紹節 黃廷鵠

張應陽 徐方廣 徐世禎 從弟徵輿 陸慶臻 兄慶曾從

張以謚 徐世禎 宋徵璧 從弟徵輿 張粉之

顧在觀 田茂遇 張淵懿 王之明

孫雲鵬 沈道映 瞿然恭 弟然畏 董黃 子枏

諸嗣郢 瞿然恭

周篆 父禮子廉 陳磨 許岳允 曹鳳苞 瞿一 章秋駕 弟秋漢

陸希倅 顧名 子問 彭開祐 任璜 唐子鏘 汪廷昭弟廷燧

沈麟 周綸 任璜 周洽 子棟孫煌 唐士恂 子曾愛

王師旦 周綸 任璜 陶爾穉 父龍徵 錢柏齡

任鏞 諸父鑰 周洽 子棟孫煌 陳昂 王心夏簡 范超 子錦

張豫章 弟大啟 陶爾穉 父龍徵 葉湄 曾孫庭槐 葉湄 子錦

畢大生 弟大啟 陳昂 王心夏簡 葉湄 曾孫庭槐 葉湄 子錦

葉澐 父宏儒 陳昂 王心夏簡 葉湄 曾孫庭槐 葉湄 子錦

周士彬 吳昌祺 呂樾 陳墅 王會圖 諸父之暮

倪世 吳昌祺 屠文漪 父旭 倪綸 子大韶

孫鉉 弟宸楨 唐璟 弟瑗瑄 倪綸 子大韶

陸箕永 子衍大 董洪 子衍大 王珠淵 父璐

邵式誥

子承祖

張澤城

子忠寅

李士元

陳桂

陸江藻

子承祖

胡大成

朱龍

蔡英

陸長發

陳鐘

胡王道 孫俊徵 張宗昊 張璠

楊陸榮

父岷世 孫如懿

陳麟詩

陸大光

陸榮和

子文啟 程

潘肇振

孫師曾 金璜 璋

葉星高

王之綱 莫毓桂

葉榮梓

子文啟 程

胡鳴玉

孫璜 璋

廖景文

王綱 莫毓桂

陸鴻繡

兄江 沈 金城子 曙

朱位行

族叔傳世 呂仁榮 子寅 鐘寅初

童士鶚

顧岳

許寶善

夏雲龍

薛鼎銘

孫乃疇 日熙

徐薌坡

顧岳

陸范鏃

夏雲龍

邵玘

從弟 淮

張紀宗

陶本華

汪時鳳

子立誠 和孝

陸貽穀

父懋功 從

夏傳禮

子惟貢

陸伯焜

孫壽銘

沈求立

父廷枋

楊祖健

子廷枋

王錫奎

弟錫景 清輔

陸友松

子旭照

范應璧

子旭照

邱思燕

金榮

俞玉海

李大綬 陸重暉

金章

族子有常

張汝遇

黃鋒

王庭蘭

任激

倪泌

子自申 程

蔣維淦

潘念晉 疇克

胡師謙

子晉雲

王有光

子自申 程

陸燦

董用 徐淵 容孫海

陸寶鏢

子晉雲

葉棟

顧仁

陸椿

子德良 德

曹希煌

方明梓 顧大鏞 鄒錡

趙逢源

父汝霖 王

金鴻書

朱化敦 張雅宗 薛光觀 陳育姜 鄒登標 陸光世 曹大澄 方信 沈麟

蔡朝杰

父鳳池 諸

趙逢源

父汝霖 王

方尙志

族人功叙

張拱

鍾杰 子

陳興宗

宗禮 楊

韓正泰

屈崙源

洪一桂

從弟 紹舒

湯運泰

宗禮 楊

湯顯業

陳以謙

王紹成

莊壽

金鳳藻

兄文星

顧元龍

戴鎮 昱

陶耕書

蔡文洽

兄文星

吳文徽 子應疇

高培源 子成基 楊

曹組城

顧後興

陳琮 弟龍

黃汝玉子茂 蔡之谷弟之宦

鄒硯 叔祖忠榮

潘信紆 祖璧父鐘

黃金鐘 子祖耀

馬權 章實枝

諸聯

徐嵐 吳標

何其偉 弟其章 陸之槐

吳廣成

周郁濱 子綸 趙斐友

孫峻

黃祖憲

蔡春雷 潘徵蘭

陸曰壽

顧誕朝

王先琨 兄先琥

蔣清瑞 王浚 唐 備銓

吳淮

沈樹金 周鵬飛 葉 唐弼

荃 李鴻 潘承 其壽 應培周 湖濂

熊其光

洪樸 子印 駱

何其超 沈蓮

胡履吉 兄家濂 袁

莊世驥 兄世騏 徐 侯許章 含

金 玉 李 雋 俞廷 賜 陳英 錡

陸斗寅 洪泰階

諸德翁

周南 父鼎

沈道 陸時英

陸日愛

吳顧譚字子默邵長子清識絕倫弱冠與諸葛恪等為太子四友赤烏中代恪為左節度加奉車都尉祖父雍卒數月拜太常代雍平尚書事時魯王霸有盛寵與太子和齊衡譚上疏諫霸與全琮子寄構譚坐徙交州發憤著新言二十篇其知難篇蓋以自悼傷也弟承附見邵傳

晉陸喜字文仲瑁次子吳選曹尚書少有聲名好學有才思嘗為自序其畧曰劉向省新語而作新序桓譚詠新序而作新論予不自量感子雲之法言而作言道觀賈子之美才而作訪論觀子政洪範而作古今歷覽蔣子通萬機而作審機讀幽通思元四愁而作娛賓九思真所謂忍愧者也其書近百篇太康中詔以為散騎常侍尋卒

陸機字士衡抗子少有異才文章冠世抗卒領父兵為牙門

將年二十而吳滅退居舊里積學十年太康末與弟雲俱入洛造張華華素重其名如舊相識曰伐吳之役利獲二俊薦之諸公楊駿辟爲祭酒吳王晏出鎮淮南以機爲郎中令遷尚書中兵郎轉殿中郎趙王倫輔政引爲相國參軍與誅賈謐功賜爵關中侯倫將篡位以爲中書郎倫誅齊王冏收機等九人付廷尉賴成都王穎吳王晏並救理之滅死徒邊遇赦而止時中國多難顧榮戴若思等咸勸機還吳機負其才望志匡世難不從旣感成都王穎恩又見朝廷屢有變難謂穎必能康隆晉室遂委身焉穎以機參大將軍事表爲平原內史太安初穎舉兵攻長沙王又假機後將軍河北大都督固辭不許機始臨戎而牙旗折意甚惡之長沙王又奉帝與戰於鹿苑機軍大敗宦官孟玖等譖於穎言其有異志穎使

牽秀密收機機釋戎服著白帟謂秀曰成都命吾以重任辭不獲已今日受誅豈非命耶因與穎賤詞甚悽惻旣而歎曰華亭鶴唳可復聞乎遂遇害機天才秀逸辭藻宏麗後葛洪稱其文猶元圃積玉無非夜光五河吐流泉源如一其宏麗豔瞻英銳漂逸亦一代之絕乎其爲人所推服如此所著文章凡二百餘篇並行於世

陸雲字士龍機弟也六歲能屬文性清正有才理少與兄機齊名雖文章不及機而持論過之號曰二陸幼時吳尚書廣陵閔鴻見而奇之曰此兒若非龍駒當是鳳雛年十六舉賢良吳平入洛刺史周浚召爲從事謂人曰士龍今之顏子也俄辟公府掾爲太子舍人出補浚儀令縣稱難理雲到官肅然下不能欺市無二價讞獄明決一縣稱神郡守害其能屢

有譴責雲乃去官百姓追思之畫像配食縣社尋拜吳王晏
 郎中令雲直諫薦才多所裨益成都王穎表為清河內史旋
 以雲為前鋒都督轉大將軍右司馬穎晚節政衰雲屢以正
 言忤意復為孟玖所怨故及於難機之敗也并收雲穎官屬
 江統蔡克棗嵩等上疏力救之穎惻然有宥雲色孟玖扶穎
 入促令殺雲時年四十二雲弟耽為平東祭酒亦有清譽與
 雲同遇害後東海王越討穎移檄天下以機雲兄弟枉害罪
 狀穎云

宋顧愿字子恭父淵之散騎侍郎愿好學有文辭於世大明
 中舉秀才對策稱旨擢為著作佐郎太子舍人早卒

齊顧憲之字士思初仕宋為建康令甚得民心入齊累官至
 豫章太守中興二年徵還比至梁武帝篡位憲之稱疾篤固

求還吳憲之雖累經宰郡資無儋石及歸不免飢寒天監八
 年卒於家所著詩賦銘讚并衡陽郡記數十篇

宋呂益柔字文剛別號松澤叟元祐三年進士官刑部侍郎
 以朝議大夫顯謨閣待制致仕嘗撰妙悟大師碑銘書船子

和尙撥權歌重於時
 衛謙字山齋父宗武字淇父官終資政殿大學士善詩文謙

風神都雅進止可觀初登進士第調丞永嘉未行元師及境
 樞密董某與語奇之版授漳州龍溪尹辭不就鹽丁楊姓者

以妖煽眾掠海上分守千戶沙全疑邑民反側將并殲之謙
 亟詣全開譬以身保無虞事遂寢復授溫州路治中又辭同

邑錢參政孫女賣謙家為婢已劑而知之命家嫗教養三年
 治匳具擇世族子嫁之其為義多類此與鄧文原趙孟頫郡

守張之翰任士林為文字交有讀易管見三十卷

元曹慶孫字繼善本處州教授邵桂子之子邵娶曹應符之女以慶孫繼舅氏後故後又名絜云延祐四年薦充平江路吳縣學教諭未幾告歸不復求仕進敷門力學為文平易條暢以理為主能盡其所欲言詩清潤古淡根柢於陶孟韋柳自成一家嘗買地崑山之陰構室以祀陸機兄弟行省聞而善之卒年七十八慶孫所居堂曰安雅人因以為號焉
曹永字世長知白長子以蒙古字學授瑞安州學正改柳州路馬樂縣都博鎮巡檢未上而卒永正書學鍾繇行草學二王墨蹟法帖到眼最辨真贋無失誤者家藏定武蘭亭善本自號蘭亭生子炳字幼文天性閒雅亦博學能詩詞張樞為著雪林先生傳

章伯顏字俊夫莊敏秦之後聰慧絕人好善樂施博學旁通蒙古文字當路薦之授邵武路蒙古學正遷延平路教授居青龍構一亭為燕居所名曰水心自題聯云表裏澄清如此水行藏端正在吾心子弼見儒術傳次子輔字鼎功於金湄建觀月堂堂前有金涇橋子孫耕樂名其里曰章家堰
陸侗字養正詩典贍雄偉題詠景物尤善鉤想往往出人意料同時若王泳趙鎮殷汝舟姚玘俱能詩文而侗為最玘見孝友傳

王文澤字伯雨初家風涇後遷鹹魚港祖大言父京並有文采文澤學尤富下筆不跡襲前人累舉不第為府學訓導卒子默字子章身長八尺美鬚髯談吐高亮折節讀書任俠多藝書法趙孟頫行筆甚捷微至京書金字浮屠經擬官翰林

力辭歸求書者填戶父沒盡鬻書買山以葬廬墓下者久之
雅好泉石遇勝處輒忘反尤喜為人排難解紛奮不顧利害
張伯雨稱其豪宕不羈有姜白石風嘗著雪齋明鑒錄秦裕
伯亟稱之

任暉字東白仁發孫父賢材由祕書監遷考城令暉喜文史
善賦詩脫去凡近與楊維禎游嘗邀至其家校讐商榷維禎
極愛重之

明杜隰字宗原宋祁公衍十一世孫父希仲水軍萬戶居杜
村有文名隰洪武初中詞科為太常贊禮郎奉使緬甸詰其
不庭卒以其人入貢上嘉獎之授禮科給事中有疾辭歸凡
兩賜手書存問卒年三十三隰好學持正文詞清俊其至緬
也緬人求題詠者車滿郵亭歸達諸朝太祖為製御序弟桓

見隱逸傳

邵亨貞字復儒桂子孫亨貞博通經史贍於文詞工書與陶
宗儀為莫逆交自號見獨居士元末兵燹移居橫泖洪武初
為府學訓導卒年九十三子克穎字伯宣有學庵集古詩能
世其業

王士顯字伯仁居青龍江上洪武初擢堂邑令三載調長山
以禮義化其民民用不犯囹圄為空官至德州同知致仕歸
生平好學不倦所著詩文皆清超拔俗

管訥字時敏居澱山湖濱九歲能文比壯儀觀偉然受詩於
劉敬思學古文於楊維禎與錢惟善倪瓚為友洪武九年以
秀才徵為楚王府紀善恭敬強力王深器重奏晉長史王常
討銅鼓蠻用訥計破之諸將欲殄其餘黨訥曰是亦人類也

奈何草薙禽獮之王從其言活者以數萬計年七十乞歸王不忍其去仍奏留本國沒葬武昌東黃屯山丁鶴年論定其詩謂可與袁凱並子延枝鶴年門人亦為楚府伴讀

錢驥字子良明初以儒士舉授晉府紀善工詩文有砥齋集居漢城里同里蔡景字元昶亦工詩父訓見游寓傳

朱熙以詩名為玉峯顧德輝社長官廣西省郎中袁凱作詩寄懷并次見寄韻答熙熙家園在橫谿中有玩芳亭見名蹟

沈度字民則粲字民望皆易子也兄弟俱善書度以婉麗勝粲以邈逸勝各臻其妙度文章尚平淡洪武中舉文學弗就坐累謫雲南岷王具禮幣聘之未幾辭去偕都督瞿能入京

師時文皇初立詔吏部簡能書者入翰林給廩祿度與焉其書為帝所賞名出朝士右由翰林典籍累遷至侍讀學士粲

以布衣召入翰林官至大理寺少卿兄弟在禁近並承恩遇賜織金衣鏤姓名於象簡泥之以金朝廷大制作俱命二人書之時稱大小學士度子藻以蔭授中書舍人歷官禮部員外郎宏治中上好度書訪其後得度曾孫世隆特授中書舍人直省閣正德間預修國史

按舊志云二沈學士居青邑與否無可考惟墓在薛山不敢意

為刪削今因之

陸潤玉字尚質博綜經史工於吟詠與夏璿張遜王桓陳黼

彭思禮郭用常輩結為詩社相倡和初自號復庵生子桂穎

敏過人悉以所業授之曰吾無事此矣桂補諸生旋以疾天

歎曰是誠大夢也更號夢庵深自韜晦沈酣於易列數圖懸

室中人非其儔不苟一接年六十二卒張弼為撰墓表

曹泰字時和居廣富林景泰五年進士以訟事有連罷不敘

英宗復辟有白其寃者名偶同景帝年號又景帝時所舉士也乃止居數月朝會得匿名書下部考驗憾泰者誣為英宗聞曰必若人也恨我廢斥耳詔逮問緹騎馳入郡時知府某與泰同年素高其誼語之故曰子亡吾為任罪泰曰君命也何所逃檻車詣刑部考訊備至遂自誣服至冬朝獻有擊登聞而號者曰投書者我也日者有母今亡是以來請就法訊之則故中書某耳泰乃得釋肢體已廢復歸里築九峯書屋以詞翰自老時人語曰富林二曹一時人豪二曹者泰與其弟時中也

曹時中初名節嫌與漢宦者同名故以字行泰之弟母亡廬墓側蔬食三年有二白鳩巢於廬紫芝數本產於庭鄉人欲聞之有司力辭乃寢成化五年登進士官刑部由郎中出僉浙江按察司事丁父艱廬墓如前補雲南僉事單車之任時普興大理旱蟲齋素步禱蟲死歲大熟陞浙江按察副使視海道勢家聯巨艦捕魚海中千百為羣為禁戢曉諭犯者坐法無貸條議振刷六事與兩司左遂乞歸時年四十餘杜門不謁守令晚年集耆老十四人為安耆會必北向拜闕而後坐性善飲喜為懷素草書出入常操一小舟久之舟壞太守吳鉞遺以舟署曰采蘋正德己巳歲禮貸米百石賑饑又力勸行賑全活萬人時中且止蔬食招飲皆不赴曰民苦絕粒而吾輩乃安高哉工部尚書林俊舉以自代不報年九十卒從弟時信字孚若宏治五年舉人官都察院司務其倡安耆會也聞南安府訓導姚鵬致仕歸時中曰會中得斯人吾屬有光矣鵬字程夫忠信誠確顧清重之宏治甲子以貢上禮

部試第一授校官修學課士師範嚴肅居修竹里

朱應祥字歧鳳其先居鳳凰山故名應祥秀目廣口雙瞳炯然郡人徐觀家多藏書嘗從借文獻通考經日送還日已覽徧矣觀疑其妄問之答應如響乃盡出所有書借之同時常熟桑悅錢塘張天錫並以文名未相識一日游湖上卽席賦詩疾如風雨天錫輩爲之閣筆累舉不售成化十三年始以歲貢入南國子監放意文酒著高士巾衣鶴氅衣放誕無禮以是爲鄉曲所譏有鳳凰山稿

高企字進之居唐行鎮諸生始師吳爰長從顧清游清修府志田糧水利企考索之力居多知縣鄭洛書以糧額不同欲均之訪於眾企言糧有輕重田有高下蓋古人則壤成賦之意歷考田糧積重之故爲田糧策力陳不可洛書稱其經明行修思齊古人浙江按察司僉事朱子和兼理蘇松水利延詢企企又詳考宋朝士大夫論議及元人任水監敷治之宜爲水利書上之性愛吟詠喜探名勝年八十餘登山猶能躋絕頂又三載卒萬歷初崇祀鄉賢祠爰字翼夫著有雪窗詩稿清爲企序之謂蕭散間靜無世俗綺靡脂韋之態讀其言可以知其人

徐獻忠字伯臣華亭人學博才高日讀書盈寸嘉靖四年舉人選奉化知縣約己惠民治泮宮通水利邑以大治未幾謝政歸撰述外無他嗜工詩文尤長於賦布賦一篇憫松人愁苦能令上官讀之酸鼻繼徙居吳興詩格更進所著書凡數百卷詩名長谷集有別業在泖涇卒年七十七門人私謚貞憲先生

案獻忠所著王志皆輯入藝文而傳獨遺今補

袁福徵字履善嘉靖二十三年進士授刑部主事與李攀龍
 王世貞宗臣齊名晉郎中世宗以邊事殺丁汝夔并怒諸曹
 郎福徵論救王忬不當死謫知沔陽州攝黃州府同知潛師
 殲賊拓地二百里立黃安縣補鞏昌知府府志作補鞏昌丞遷唐府
 左長史以發偽疏忤中貴意褫職復羅織冒禁乘傳下獄事
 白歸居於柰山以詩文棊酒自寄性奇爽侷厲出言若流釋
 褐六十年家徒四壁殘書萬卷而已子之熊之羆皆負才名
 孫思明字用晦萬曆三十五年進士官至南京禮部郎中有
 清節

張之象字元超晚號王屋山人以監生遊京師徐階知其才
 諷撰青詞中翰可得也不應已而入貲就選浙江按察使知
 事明詩綜時同郡秦嘉楫為僉事待之頗峻又數以筆札役

之遂投劾歸卜築神山搜山中景物成三十二詠人謂盡山
 水之勝著詩十一種其叩頭蟲賦譏諂嫉邪尤有關於世教
 與何良俊徐獻忠董宜陽時稱四賢御史邢侗入吳命駕就
 訪時之象臥疾茶爐藥盃狼籍几牖侗直前握手慰勞恨相
 見之晚問所欲對曰老人無他嗜惟嗜邱壑耳出示所著賣
 書買山詩侗厚贈之因以建四賢祠卒年八十一子雲門操
 尚貞素孫齊顏博學嗜古曾孫蓋臣能世其學三世並舉孝
 廉蓋臣兄寶臣亦有文名

沈邨字才華安亭鎮人幼孤為章堰章氏贅婿遂占籍青浦
 嘉靖中以歲貢生司訓句容時句容令丁清惠賓與之交以
 直諒多聞稱之

陳一鳴本姓朱字起靜性剛介少嘗從父宦游以詩受知於

嚴嵩嘉靖中貢入京顧定芳言之嵩嵩曰非曩時倡和人耶其驚人句我猶識之當令若來見定芳以告一鳴曰某老矣誰復能望塵雅拜冀旦暮得好官乎竟不往遂不謁選而歸養母終其身

王圻字元翰嘉靖四十四年進士除清江縣知縣調萬安擢御史峭直敢言忤時相出為福建僉事設方略殲巨盜張文欽陳文岱等餘黨解散忌者復構他事謫邛州判官兩知進賢曹縣遷開州知州歷官陝西布政司參議乞歸養築室吳淞江之濱種梅萬樹曰梅花源以著書為事年踰耄耋猶篝燈帳中丙夜不輟所撰書見藝文皆經世巨儒之學卒年八十一祀上海鄉賢祠初圻在西臺為趙貞吉所推張居正與貞吉交惡諷圻攻之不應高拱為圻座主時方修隙徐階

又以圻私其鄉人不助已不能無恚遂摭拾之故至遷謫云孫昌會字嘉侯舉人方岳貢聘修郡志賦役鹽權數大端皆出其手昌紀一作字永侯幼穎敏讀書數行俱下輯十七史四十餘年足跡不履闌闌時稱王氏二龍曾孫世奇國初縣諸生

戚韶字龍淵居唐行鎮意氣豪邁好古博雅其詩遠宗楊陸近學莊陳與王良佐張冕齊名陸樹聲稱為安貧自得之士韶初與孫承恩不相識承恩北上韶作詩送之極為所賞韶沒承恩因合良佐冕詩刻之曰三詩翁集

莫是龍字雲卿以字行更字廷韓父浙江布政司使如忠嘗築樓居於鳳凰山是龍生有異姿日記數千言十歲能作文十四補華亭縣學生改入青浦工古文詩詞通畫理尤長於

書意氣豪逸藻思穎發一時諸名流無敢抗席學道高其名不次選貢入太學時宰有欲以翰苑處之者是龍意不屑也王世貞汪道昆咸推重之張佳允巡撫江南彌加敬禮居恆喜延獎後進常若不及有文集行世

顧從義字汝和英曾孫嘉靖二十九年詔選太學能書者直文華殿從義授中書舍人凡三膺使命一使金陵一使魯陪祀海岱事畢下榻李攀龍白雲樓相與倡和隆慶初以登極詔諭雲南沐黔國以金百鎰為壽却不納旋以預修國史擢大理評事有石癖得米元章硯山遂以為號又得宣和紫玉泓硯構館藏之手摹宋本淳化閣帖兼善繪事有硯山山人詩藁行世

張德讓字士美元澄子病跛少棄舉子業作病鶴賦以自况

受書法於陸深規摹李邕求書者常滿戶絹素堆積飲微醅乃使兩童曳對前立不著几案揮灑立盡亦善於繪事

彭汝讓字欽之邵武知府應麟子也入國子監中萬曆元年副榜為隆萬詩文社十八子之一著有北征南游擊筑諸稿子維曦字東陽縣學生汝讓坐攀留郡守李多見事中蜚語被收考掠幾斃維曦上書請代辭甚楚陸樹聲王錫爵聞而憐之致書直指使者俾言其枉及事白室如懸磬維曦孝養盡力父子倡和以為娛有鶴和草附汝讓集

何三畏字士抑居鳳凰山萬曆十年中順天鄉試授紹興府推官執法不少貸署嵯諸暨兩縣事多異政會以表刑節婦拒貴人請置訟者於律中蜚語遂乞歸後節婦歿有司建祠祀之公論始著三畏歸後遭母喪誓墓不出晚歲專精構撰

雲間志畧一書董其昌稱爲不朽盛業有芝園居廬集鳳山拜石堂稿

潘可大號星海少貧力學屠隆寒夜巡城聞茅屋中讀書聲迹之則可大方讀漢書以此得名中萬曆十三年舉人初任慈谿教諭學道某以所作詩屬書可大斥其落韻雖忤不顧也陞衛學教授遷知縣乞歸子衷駿字震開萬曆四十三年舉人能詩文工書法早沒

章憲文字公觀華亭人曾祖翰字坦齋諸生工古文善八分書讀書屢空與顧清善徐獻忠出其門下祖斐父雲鳳皆工詩憲文少貧偕妻董氏事親以孝聞萬曆十四年成進士官工部郎督潞王行殿於通州權璫欲乾沒憲文堅不能奪又督漕艘於淮釐剔積弊省採木銀五六萬計丁父憂歸除服

入都以前事左遷澤州同知視事六日忽心動急告歸母已卒遂絕意仕進營白石山房於東余翛然高寄守令皆嚴重之年六十一卒祀華亭鄉賢

洪都字九淵號紫崖歙縣人青浦籍萬曆二十三年進士選福建歸化知縣擢南工部主事遷郎中出知台州府其在歸化題署云民風僻壤原鄒魯吏治青山但嘯歌其意趣如此爲文亦法度可觀

張鼎字世調一字侗初烈子萬曆三十二年進士改庶吉士授檢討歷國子監司業諭德庶子少詹事升禮部侍郎天啟中以忤璫削籍起南京吏部侍郎未赴卒於家鼎因天變陳八事指及宮闈痛激感憤幾及於禍天下推爲正人嘗卜居青浦今珠街鎮之關帝殿相傳鼎讀書處也

王朝英字澄宇蘭谿人居麟祥洪萬歷三十二年歲貢任浙
江秀水教諭著有白雲草唐汝諤字士雅博學好古為知縣
屠隆所重天啟中貢歷任常熟宿遷教諭陞安慶府教授年
老不赴亦能詩

黃廷鵠字淡志一字孟舉深於詩嘗論名賢篇什有詩人文
人之別詩人情深而興遠文人體工而法密識者多韙其言
中萬歷三十七年舉人選寶應教諭作尤言八篇訓士遷浙
江嵎縣知縣以裁抑水陸郵遞失監司意左遷順天府經歷
崇禎初轉通判嘗進為臣不易編特嘉納焉會有論廷鵠不
當得京秩者議外調遂歸不數年卒

陸應陽字伯生郊子也少補縣學生已而被斥絕意仕進詩
宗大歷黃洪憲及許國申時行皆折節交之王世貞好以名
籠絡後進常譽應陽應陽不往時論益以為高萬歷時修復
孔宅應陽之力居多卒年八十有六應陽作詩喜用鴻雁字
人呼為陸鴻雁

周紹元字希安思兼長子早孤攻苦績學年二十困於病遂
杜門學詩工八分書精篆刻與弟紹節友愛卒之時相去僅
六日紹節字希允諸生以病不應科舉論著兵農水利救荒
賑貸諸書皆切要務子裕度諸生以道誼風雅重於時

范濂初名廷啟字叔子萬州牧廷言之弟日誦萬言補縣學
生名與兄埒是時經生多以靡麗相高乃作文機十論矯之
又著一家言時推為赤幟尋上書學使者請削博士弟子籍
服山人服隱余山長貧善病而高視濶步以作者自命著空
明子據目鈔兩書行世譏切時事巡撫聞逮繫於獄已而出

之誠曰無再為此足以殺身既免署所居為一寒齋以詩酒自娛年七十餘卒

張以謚字伯安以誠從弟少嗜古為文章與以誠聲譽相埒知縣羅朝國有國士之知後朝國躋九列以謚未嘗通一札也同學徐方廣王宇春聞啟祚等咸推重其文年四十餘棄諸生號鈍叟自為志狀人稱其曠達年八十五卒著有來燕堂集

徐方廣字思曠華亭人晚居佘山本姓黃冒徐姓入庠故名與字皆藏黃字焉篤志好學與人言某事出某書第幾卷第幾行無一誤者性狷介有門人為貴官餽遺甚厚方廣惟受一剪為文精微妍妙李長蘅凌義渠亟稱之
施紹莘字子野父大諫字叔顯萬曆十六年舉人年方二十

不樂仕進閉戶註老莊以恬退聞紹莘少為華亭縣學生負雋才跌宕不羈好聲伎工樂府與華亭沈龍善世稱施沈時陳繼儒居東余詩場酒座常與招邀來往初築丙舍於西余北復構別業於南湖西自號峯泖浪仙早天無子時論惜之張世雍字成之初名世基以誠孫也少穎異作帝京賦五千餘言以誠甚愛之崇禎四年進士授刑部主事癸酉典貴州鄉試朝議以為得人越明年卒年三十

徐世禎字雲將本姓朱崇禎九年舉人官敘州府推官晚自稱芥庵老人素有文名與陳所聞友善子龍髻年應試江陰所聞屬為左右之後子龍殉節世禎序丙戌遺草謂其詩古則漢魏今則少陵詞如清平花間不作宋人語後世必有知之者且為續輯年譜焉

張昉之字梁公華亭人青浦籍陳子龍時為同舍生延子龍讀書其家甚相敬禮昉之入南監中崇禎十五年舉人明年成進士授行人司行人國變後披緇以終雲南楊永言流寓華亭昉之與交善顧炎武贈楊詩云同年張翰在謂昉之也爰武嘗以事下松江獄兩人俱往來相契楊亦遺民混迹于僧者

顧在觀字觀生諸生博覽經史陳繼儒見其史選曰神明識量不可及也因推鳳凰山來儀堂居之楊文驄為府教授命子師事焉後馬士英辟置幕府嘗以昵阮大鍼羣情致憾語士英及士英輔政時方起用老成而大鍼欲以一網盡之在觀又語士英曰如大鍼之才智加以積怨一朝得志為所欲為必不顧其後此事關公門戶亦千萬世清議所繫且以告

士英子鑾鑾幾諫至涕泣隨之其時不致白馬清流之禍者在觀力也繼知事無可為即告歸瘠田二頃力耕自給以逋賦失產窮死陸榮秬葬之

國朝宋徵璧初名存楠字尚木明崇禎癸未進士授中書充翰林院經筵展書官尋差督蘇松四府柴薪銀未復命會國變歸里入本朝薦授秘書院撰文中書舟山之役徵璧從征有功轉禮部祠祭司員外郎擢清膳司郎中終於潮州知府徵璧鴻才麗藻與從弟徵輿有大小宋之目著有抱真堂集

陸慶臻字集生彥章之孫前明舉人有聲幾社順治八年揀選推官不赴慶臻生長華廬兄慶曾弟慶衍咸以才名重當世既遭鼎革貧甚且不克葬親嘗泣曰得墓田一笏營葬足

矣故自稱笏田游幕燕晉間晚始杜門四方賢士大夫造請
 無虛日年八十一卒慶曾字子元才情繁縟為吳偉業陳維
 崧所推中順治十四年舉人以科場事徙瀋陽卒於戌所子
 鳴五從徙十八年塞外進鹿於主者至京師復給假歸里
 未幾仍返高層雲作汗血行贈之稱其美秀而文工於騎射
 孫雲鵬字扶雲縣學生居珠谿少能詩及長南游越北至燕
 寓青州入西安還登太行由中州上嵩少探奇攬勝一寓諸
 詩又能畫侯宏曹爾堪施閨章柴紹炳皆與論交而沈荃受
 業門下最久晚歲倦游吳懋謙定其詩後有沈道映字彥澈
 夏允彝從孫甥也好遊歷燕齊及越晚歲又至武岡彭開祐
 署有鴻迹軒詩草亦縣學生
 田茂遇字楫公號髯淵居貞谿少遊夏允彝門以詩文鳴順

治戊子舉於鄉授新城令不赴康熙二十年詔徵博學鴻
 詞之士魏裔介薦之召試瀛臺以病罷歸晚築園亭於水
 西卽元邵桂子居故址掘地得奇石甚眾名曰邵園草堂中
 有藏書萬卷著述甚富與張淵懿董俞選十五國風行世淵
 懿字硯銘居神山順治甲午順天舉人與茂遇為忘形交顧
 開雍字偉南明諸生順治壬辰貢入京病失期有司卻其籍
 茂遇聞之單騎走淮上謁學使者言開雍實病狀得給書專
 請往返千里人高其友誼開雍初與陳夏齊名晚年築室玉
 屏鳳凰間著述以終性和易而詩文極峭刻書法亦古勁
 王之明字敬章本姓程順治十二年進士選縣令不赴改任
 安慶府教授卒官之明家極貧弱冠卽為童子師時值兵火
 後人多廢學之明獨刻意攻苦為文能自成一家知縣唐瑾

深賞之

諸嗣郢字乾一其先由琴村遷縣城嗣郢幼為徐方廣弟子
 陳繼儒董其昌見之目為神駒順治十八年成進士未殿
 試逋糧案起被斥嗣郢秉尚幽貞夙有買山之願既錮廢乃
 搜沼架壑九峯間各有營建自號九峯主人歲以上已重陽
 招賢士大夫游且以祀張翰陸機陸雲顧野王張之象諸賢
 與其會者人人自以為登仙時陸振芬周茂源謝官歸皆築
 室山中往來過訪觴詠尤數與崑山葉方藹善約共隱方藹
 字子吉號訥庵嗣郢築吉亭訥齋以待又貽當歸以諷之康
 熙二十一年方藹卒京邸未幾嗣郢亦歿年五十九嘗與父
 丹山撰九峯志未成修邑志復為他人所亂非其志也
 瞿然恭字欽我居千山幼穎悟年十三補縣學生尋棄去能

詩以善書名喜與方外交流轉四方所至緇素爭邀致之弟
 然畏字觀我亦有詩名

周篆字籀書號草亭世居泖田父灃字禹功博學有奇略遜
 跡終老嘗徙南潯又自潯徙章練塘後遷吳江嚴墓篆年三
 十五矣少穎敏能詩古文弱冠問學於顧炎武炎武告以須
 務本遂博究經史性閒逸不樂仕進中年從父出游歷南北
 於河渠兵農錢穀事益加諳練凡所著述皆切中當時利弊
 持論甚正年六十五卒子廉字來叔善詩

董黃字律始陳子龍廬墓富林黃從之游子龍悉心指示得
 宗法焉隱居不試所作才情綺麗取則徐庾尤工於詩居奈
 山白石之谷自稱白谷山人子枏字少楹縣學生亦以詩賦
 見稱

陳磨字機來父功邑名士磨少承家學才氣卓越善詩畫以諸生高等應試南闈輒報罷病卒其前有許岳允字文伯瞿一漢字貞子曹鳳苞字授章皆以高才通古學不遇鬱鬱而

沒

陸希僊字孝曾諸生入國朝以名士聲望讀書玉屏山中

有忌之者遂北之燕康熙戊申客死旅邸時蔡襄敏士英家

居夜夢一人儒衣冠進謁自通姓名乞返骸骨同里林子卿

館於蔡質之信大異之因厚贈以歸櫬歿後著述散佚僅存

關中偶筆數紙云

顧名字子賓金澤人耕讀為業工詩日於井曰機杼旁與子

女唱和為樂吳偉業亟稱之子問字切思精篆刻著強裁詩

草

章秋駕字彥生順治時諸生居章堰與弟秋漢並以詩名著

金湄詩草詞旨淵雅饒有中晚唐格韻

沈麟字友聖諸生居青龍江父坤仙著編年考極淹博麟道

風秀世才高遇窮初躬耕淞濱屏絕人事後杖策遠游梯山

登谷詩筆益豪妻彭氏貧女也工吟咏有鹿門倡和集漢陽

顧御史如華官京師與為布衣交如華卒於楚不遠千里奔

赴其喪人皆誦義麟妾亦能詩其往漢陽也妾賦詩贈別惜

姓氏不傳

彭開祐字孝緒父彥昭見隱逸傳開祐少即嗜學工詩古文

與錢金甫讀書春藻堂交游日廣春藻堂之名流播遠邇以

選貢中康熙十四年順天鄉試明年成進士歷任河間知縣

武岡知州並有政績晚歲歸老橫溪老屋年七十九卒著有

春藻堂稿

案漱芳齋詩話云橫溪老屋在青浦縣治西虹橋上蓋跨溪東西俱有屋也青志不收誤今據列之

唐子鏘字依在昌世子縣諸生以奏銷案黜康熙十一年授例入監領鄉薦十五年成進士授內閣中書以父老乞歸養遂不出畱心經史及六官典要文譽翔洽所丹黃本時人奉為圭臬

王師旦字致平康熙十七年舉於鄉明年成進士令穀城穀城故巖邑師旦寬猛相濟民用以治乞養歸與子弟及里中後學礪詩文詩格清超文體醇茂學者宗之

周綸字鷹垂茂源子隨父客京邸頗有名貢生 廷試第五授國子監學正為王士正所知生平以經世為志嘗上書巡撫湯文正斌請秋糧官收官兌又為松江士民極陳浮糧之弊言雖未盡行時論賢之任潢字秋雯居縣城南董黃周綸

王原嘗主其家為文酒會有南軒唱和集今不傳

汪廷炤字宸光金山衛貢生謝子飛失其名本張姓少承謝氏祧縣學生皆居沈巷與沈荃為貧賤交荃既貴未嘗干謁時咸高其孤介俱有品學為人師子飛後徙家瓢湖廷炤弟廷燧少負奇氣應童子試見搜檢恫喝浩然而歸專事古學晚輯萬姓譜未竟卒

任鏞字右洪世居沈巷少通五經深於詩婁縣諸生以進糧案斥所居玉雨軒花竹叢密延王夢求為師日與名人詞客詠歌其中以適志從父鏞字青門縣學生充貢考授理問鏞亦王夢求高弟子湧字飛濤府學生俱有文譽

周洽字再熙居剌店年十六七學畫於趙左不數月盡其技旋學詩於李衍洽然可誦遠近貴人爭延致之知洽有才不

敢目以藝士在河道總督靳輔幕時河工始告成以黃河圖屬洽乃徧歷兗豫雍冀四州之地閱四月相度河勢迂直緩急及隄閘要害之處摹寫進呈 上覽之下 詔褒美洽晚讀王守仁書覺生平所疑渙然冰釋不復畱意於繪事然興至時欣然弄墨人爭寶重年七十五卒子棟孫煌工書亦能詩煌以拔貢官繁昌教諭

唐士恂字子恪縣學例監生父靜之鼎革時棄諸生隱居珠里嗜古賦詩以善行稱士恂少負軼才自比唐寅詩法盛唐古文奧衍駿厲不作唐以下語崑山徐乾學家居見其文大驚曰昌黎不復生斯人直追古作者矣延諸賓館鴻博科開巡撫慕某兵備道方某交相推舉士恂堅辭不應上海令史彩敦請修志與葉映樞朝夕考論甚相得映樞殉節武昌聞

之慟哭兩目為枯喪歸時其家欲假館受弔士恂貽書止之博授經義侃直可傳又上書蘇撫某為映樞請諡得 旨允行晚益貧目病至不能辨物卒年五十九所著嵩少山人詩文集十卷多散佚道光時元孫華刊行子曾愛布衣有學行張豫章名翼以字行若羲子與嘉樹玉樹並以文名吳下有三張之目康熙二十七年進士第三人及第授編修歷官左中允貴州學政入為國子監司業卒豫章在詞垣以溫雅見稱少時游迹遍歷南北詩文得江山之助有南帆寄亭諸集宋琬周亮工皆稱之

陶爾綖字穎儒居珠溪父龍徵縣學生著有問菊軒集爾綖康熙三十年進士選知上虞縣廉明惠愛百姓日為神宰擢知葭州以疾乞歸 聖祖南巡 召見試以文詞稱 旨令

扈從還京師入直 內殿月餘以葬親復乞歸歸數年卒爾
穉少以才名重於時高士奇深愛之招致賓館最久及士奇
被謗南還爾穉方在太學舍其業而從士奇尤器重云

錢柏齡字介維大學士龍錫家孫也龍錫身後子姓不免饑
寒柏齡遨遊四方才名甚盛宋犖延諸江西幕府深相欵洽
復與朱彝尊高士奇投契以監生應順天鄉試不遇晚歸老
澱山湖旁卒年八十有四著有澱湄草廬詩存案青浦詩傳云柏齡居沈

巷今從松江詩鈔

畢大生字兩稼貢生春融堂集少有才名詩宗范成大陸務

觀書學顏真卿李邕又工填詞帆影簾影諸闕甚為時賢矜

許朱彝尊高不騫查慎行魏坤皆與友善兩游京師一適晉

再入閩卒無所遇晚客山東以病終無子著有秋蘭介雅堂

詩宜興蔣景祁刻入輦下和鳴集今存白岳山人集增倪某

輯也案倪本姓葛詩傳所云一女適葛是也弟大啟字載績能畫竹有名

陳昂字書崖候補府同知性簡素家多藏宋元舊書好賓客

與朱彝尊贈答有澱山倡和詩卷陳銓補圖案珠里志云曝書亭集注稱同

范超字同叔善隸書篆刻兼通醫畫詩才秀雅曾和王士正

秋柳詩最工羣以范秋柳呼之諸嗣郢引為忘年交入國學

應京兆試為韓菼賞識而卒無遇合故自稱布衣為人灑落

善飲風雅中不少質樸後以中酒暴卒年六十二范逸初名

述字亦緒當鼎革不樂仕進更今名字遺民與族兄超並居

黃渡少嗜學父令守肆挾書吟誦或盜肆中物不覺也久之

博洽能詩亦能醫稱黃谿二范舊志謂二范不同族者非年五十五病瞽

青浦詩傳作年未五十而薨亦非猶為家師口授經書無論舛所交唐瑀茅

藩徐杏輔沈白李燧輩皆安貧守賤之士卒年七十二所著

俱見藝文案逸前志不列傳今據詩傳入之黃渡志云逸居勸朝樓在華潮浦職思堂在赤雁浦皆青地也

葉澐字蕃久安亭鎮人父宏儒字岳心少從姚江史孝咸講

性命之學未冠補崑山諸生後棄儒服以隱遯終澐由青浦

籍肄業國子監亢爽無脂葦習好論列天下事游歷時見民

生疾苦悉寓於詩文久客京邸大臣彙薦其才將得官矣不

就選歸見稱于楚黃顧景星

金昂字曠民沈巷人布衣沈靜寡默耽吟手不釋卷工草書

又精醫同里王心字載甯與夏簡並長古文有筭谿雙鳳之

目心有十友樓延致一時名士而為之主亦喜為詩簡字宛

青十友之一也昂亦十友中人曾孫庭槐字柱峯以昂詩乞

序徐薌坡稱之王心任鏞遺詩皆庭槐所編錄亦能世其醫

葉渭字蒼雨諸生工山水小景筆意蒼秀性癖不肯為俗子

作寸幅沈白贈詩云堆門金寶如無覩只寫青山與故人紀

實也詩不多作自訂擊壤吟二卷子錦字芳蔡八歲能詩試

輒不利不得一衿生平寡言笑好披閱古書嘗作明史補傳

歿後其妻恐有違礙悉焚之詩尚存

周士彬字介文世居干山由縣改府學生事繼母張以孝聞

甫成童日夕織簾以供甘旨暇即記誦經史及長有文名施

維翰為山東巡撫聘致幕下時裁東省提標兵兵忽變士彬

佐維翰撫定之後欲薦之朝以親老辭歸中康熙三十五

年鄉試副榜年七十八卒有山舟學詩草

呂樾字開藩師同邑陳墅墅字臨遠弟坦各以詩鳴樾康熙

年鄉試副榜年七十八卒有山舟學詩草

呂樾字開藩師同邑陳墅墅字臨遠弟坦各以詩鳴樾康熙

年鄉試副榜年七十八卒有山舟學詩草

呂樾字開藩師同邑陳墅墅字臨遠弟坦各以詩鳴樾康熙

三十八年舉人喜出遊足跡半天下所至當事禮以為師及門多貴顯者大學士高斌其尤著也知陝西盤屋縣有善政年老乞歸家居二十載吟咏自得卒年九十一

王會圖字昭令懋忠孫師事陸從龍而與從龍子祖修祖彬及唐士恂為友稱東湖四子年三十補諸生徐乾學方家居招致名士聞會圖名介祖修招之卒不往屢試不遇以歲貢終會圖研究理學以樂天知命為宗詩文其餘事云諸父之謬字季猷布衣工詩詞其卒也會圖撰墓志

吳昌祺字綏眉縣學生諸子百家靡不通貫尤究心於詩晚取唐汝詢唐詩解悉心刪汰之足以津梁後學倪匡世字永清居張管山之梅花園後移家泗涇放情山水日事鉛槧著詩最徐樹本稱為青邑詩人

屠文漪字漣水婁學生家珠谿父旭字初生府學生為人淡宕詩亦如之文漪平易清約束修自好善算術著九章錄要人稱其簡括弟宸禎字周士太學生亦工詩詞王昶云兄弟食貧攻苦互相倡和詩倣石湖誠齋駸駸入古而詞則玉山碧田之亞也

倪綸字蘭皋縣學生少學於王夢求程化龍喜歌詩三十年積至數千百首有元白風走京師躡躑無所遇其詩益繁李天馥王日藻定其燕臺游草刊行於世

孫鉉字思九由華亭附生入太學有名春藻大雅兩社中稍長從汪琬徐乾學宋實穎游性好客一時名士無不與文酒交嘗輯皇清詩選兩集至于有餘家琉球國購得之其國王及臣以詩寄鉉乞選入集蓋行遠若此孔宅久廢不修康

熙中 聖祖巡幸松江至青浦 鋌借諸生敬請 宸藻表揚
 得 旨於是外建碑亭中建 御書樓殿閣廊廡煥然鼎新
 并輯孔宅志衍聖公孔某題授國子監典籍不赴年六十八
 卒

唐璟字侶宋諸生有怡庵倡和集自序云髫年受經時學詩
 者非唐不宗邇年始有宋詩鈔刻披誦之餘偶然則效輒不
 自知蓋由唐入宋當時風會如此弟瑗字師蘧貢生官宿松
 訓導瑗字來虞雍正癸卯舉人已酉應浙江闈聘官當塗教
 諭太平府教授康熙辛未仲夏璟與瑗瑄舉素心吟社放舟
 小鏡湖分賦五言古二章同社者十九人璟為之跋案此邑
 中所稱

三唐也至後三唐詩傳道復
 鼻表僅列名事實失傳俟考

倪蛻本名鵬字振九晚慕劉蛻之為人易名自號蛻翁監生

世居薛山游幕四方康熙間從甘國璧雲南得議敘知縣至
 後買山於昆明石磧村築室以居總督張允隨立石道旁題
 曰蛻翁草堂無子有女曰亦夢贅婿昆明闕氏子孫或從蛻
 姓有以科第顯者著有鳴劍閣集族孫駿煦所藏蛻早年作
 詩規摹古人不屑苟同凡近入滇後詩境一變雄豪奇麗袁
 文揆滇南詩載選錄甚多姜兆紳欲訪其全集歸松以存文
 苑焉兄子大韶字舜文華亭增貢生著有藻溪草堂詩文集
 陸箕永字二水慶臻第五子縣學生康熙四十年 聖祖南
 巡獻九峯賦 召試行在令赴京再試 暢春苑 賜御書
 孝經暨衣服筆硯給路費歸四十四年復遇 南巡獻廬山
 賦奉 旨賜監生入直 武英殿食七品俸在翰林院行走
 與纂修佩文韻府 賜第於旃檀寺書成選授四川綿竹知

縣以明惠稱雍正二年擢古北口同知四年調廈門同知攝興泉道事年六十四卒著賜書堂存稿

董洪榜姓胡字育萬居崧宅幼有神童之稱年十八補縣學生尙書張照父彙見而異之畱與照同學康熙五十一年成進士改庶吉士授檢討六十年充會試同考官舊例會試閱卷迴避本省時總裁遂甯張鵬翮以二場論罕當意命洪閱遺卷得宜興儲大文置之第一榜發以違例左遷助教量移行人行人爲京秩中間曹居職者或經月不入署洪約僚友日至焚香煮茗手周易老子質問疑義聞者歎服雍正七年充順天鄉試同考官乾隆六年陞刑部員外郎冬充律呂正義館分修官明年病卒少子衍大字宗圖幼聰穎一目十餘行工書善畫諸生

王珠淵字長源父璐字爾公由吳縣洞庭山遷珠谿爲縣學生以能詩聞珠淵康熙五十五年舉人初治尙書繼治周易家故貧授徒自給所居破屋兩間井匱庖湍聚一室雨時持繖蔽之客至往往倚門而語晚選全椒縣教諭

邵式誥字鏡臣歲貢生游高士奇徐元文之門與陸祖修陶爾穉諸人爲詩友晚年自營生壙竝築東圃草堂以老孫玘自有傳

張澤城字虛受以誠曾孫居恆沈默篤於孝友弱冠入京師何焯王揆咸以國士目之康熙五十九年舉順天鄉試雍正十二年詔舉博學鴻詞有司將澤城送巡撫考試固辭曰澤城老矣焉能握管向人求試耶不赴詩文外兼工書法神似董其昌卒年八十有一子忠寅字賓曰諸生例貢有天香

閣藁精醫術亦工書

李士元字一齋金山衛學生系出元木華黎之後有咬兒者鎮撫松江沒葬於郡城其後遂改姓李居廣富林能詩有一齋焚草

陸江藻字論思元炳子金山衛廩生嘗館珠里吳氏吳買田署其名於券尾明日衣冠至塾告以故餽銀五十江藻曰子意良厚我豈作介紹來耶何以非分溷我拂然告歸吳謝過易券乃己子承祖字武昭舉人中會試明通榜任寶應教諭著有杏林書屋詩稿

胡大成字聖集秉性孝友律已端方戚黨仰重與張奐曾周文選張世祿屠起泰結詩社稱金溪五老時珠里有朱瓏字集蓉賦性淡漠喜吟詠就館吳中課徒之暇惟事著述有寫

心齋詩鈔陸范鏃序行

蔡英字培元以浙籍登雍正癸卯鄉薦任湯溪教諭課士勤慎郡守馬某以品學並優薦改籍青浦選潛山教諭病不赴年逾七十終著有咏莪軒詩稿陳桂字葆元由舉人官永康知縣合邑稱德調桐廬罷歸亦有文名

陳鐘字玉延婁縣人福泉諸生庠姓沈以舉人考授內閣中書工詩文師事焦袁熹與曹一士善所居不蔽風雨勵節彌堅年六十餘卒

楊陸榮字采南婁縣諸生居學潭西自號潭西早慧博通古今王原妻以女得其傳學益進著述繁富莊師洛稱其詩飄飄有仙意研究經史諸書論頗辨而殷頑錄三藩紀事本末尤於忠義加詳

陳麟詩字穎傳居珠街鎮兄蔣麟字雲稼縣學生能詩賦麟詩為諸生每試輒冠其偶聲望出曹一士右以歲貢終年七十八同時為經師有雷長發字宸修陸大光字中黃胡王道字序東張宗昊字果修孫俊徵字啟南張璠字魯儒咸以工詩文能教授名而麟詩尤著

潘肇振字文起父岷字孝陟世父恪如字孩士懿字愷容皆以文學著於時肇振少為縣學生承其家學內行純篤愛杜韓詩年五十以家事付二子每日垂簾靜坐丹鉛校勘詩文舒徐容與而有則小詩多言外趣古體亦有似韓者屢躡場屋以諸生終嗜酒長吟遇俗人尤掉頭不與接人咸目為狂葉星高字青岑諸生有文圃草堂存稿董均序謂其温厚灑灑本於胸襟浩落

陸榮柘字錫山振芳孫華亭縣監生編修高興以學行奏聞與纂駢字類編書成丁父憂不及議敘而歸乾隆元年副都御史陳世倌疏薦博學鴻詞不赴著有香林詩文集弟榮程字純川康熙五十二年舉人才思超邁銳於讀書少與榮柘齊名時復有二陸之目榮程長子文啟字東諸生能詩工小篆分書第七子愔宗見仕績傳

胡鳴玉字廷佩恩貢生殫見洽聞工詩賦雍正十二年詔舉博學鴻詞巡撫高其倬學政張廷璐薦之乾隆元年召試以病疾發報罷既歸弟子日進領袖騷壇者三十年生平精讐校人有以詩文集質者必瘁慮覃思正其謬誤無諱長洲沈德潛稱為古道所著三傳傾液國語國策舉芳老莊取炎行飯龐言耕餘偶輯諸書以晚歲書序被誣家人懼焚不

傳惟訂譌雜錄已行世尚存孫師曾字宗彝國學生詩承家學以和平恬淡為宗與鳴玉友善者王之綱字御紀諸生居邑城著有蜀游草莫毓桂字丹仲雲卿裔孫諸生有西余偶吟金璜璋字蟠溪淡泊寡欲有蟠溪吟草皆見稱於鳴玉葉榮梓字孝常吳縣洞庭山人占縣籍廩監生鴻博科再開知縣李宜昱薦之巡撫高其倬達於朝乾隆紀元與鳴玉同至京召試保和殿不第鳴玉先歸榮梓就易州館年五十矣吟興猶豪榮梓呂樾之甥詩才清雋揮灑自然性愛佳山水登臨題詠俱饒秀逸之致

金濬字鈍餘一字東銘乾隆三年舉於鄉十四年中會試明通榜選建德縣教諭未幾以事被議歸覃心詩古文而古文尤深造以清峭逋潔為宗池樹儀字敘初居池家港濬同年

舉人也亦發明通榜官蒙城教諭日設文會於明倫堂以課士一時稱盛

廖景文字覲揚婁縣籍乾隆十二年舉人選授合肥知縣興學救荒多善政以參案去官卜築小檀園于清溪橋畔時復出游閩粵嘯傲溪山吟情倍勝乾隆己亥春招名流為神余被禊之遊歸置酒園中取右軍蘭亭序字限韻分體賦詩顏之曰修禊吟王昶為序著吟香集得國風之旨以香豔勝陸鴻繡字黼天以舉人官閩中知縣改吳縣教諭才情華美風雅多文自燕入蜀所過古刹荒祠殘碑斷碣摹搨甚夥晚年筆法尤入古

朱位行字因在拔貢生性行貞潔學問深純受業於金壇王步青無錫秦蕙田文章有宗派詩亦灑然出塵

童士鶚字振臺歲貢生植品方正終日把卷不知有人世事
 一日士鶚壽弟子咸具酒脯詩文為祝受詩文而返酒脯翼
 日邀集門下士乃悉具衣冠入座良久令子以菘豆煮湯進
 曰寒士酬賓取辨於籬落間足矣平生古道照人類然
 沈海字百川專精制義果銳廉悍舉人大挑知縣分發浙江
 未任卒兄江字濬川縣學例貢生亦以能文名時稱二沈同
 時沈金城負文譽歲貢生子曙舉人授廣德州學正
 蔡源字魯山少與族叔傳世受業於孫俊徵師皆卜為國器
 後傳世領鄉薦源止登乙榜教生徒多成名時偕朱位行呂
 仁榮金榮顧岳詩文雅集邵玘稱其得詩人之遺兼工分書
 卒年七十有四子寅鐘字大鏞歲貢寅初字旦華恩貢俱能
 詩仁榮字企賢亦歲貢岳字書巖事親孝多習舊事分纂邑

志表揚節烈孝義甚至福泉增貢

許寶善字敦虞乾隆二十五年進士授戶部主事歷員外郎
 中擢浙江福建道監察御史兩充順天鄉試同考官以墜車
 傷足乞假歸寶善早以詞章鳴客莊親王邸名流引重晚年
 學益進歷主鯤池玉峯敬業書院而玉峯最久五經四書俱
 輯要以導人學者多成就有自怡軒詩集及穆堂詞曲行世
 薛鼎銘字象三上海虹橋人父仁本良醫也有陰德鼎銘幼
 警敏弱冠為名諸生巡道翁藻深器之乾隆十八年以五經
 舉於鄉越十年成進士歸班待銓家居課徒操觚家奉為圭
 臬選浦江知縣興廢補敝重濬月泉創建十三賢祠續纂邑
 乘修官廨政聲卓然甲午丁酉為鄉試同考官後因公被吏
 議謫居西湖與汪沆鄭虎文往來倡和詩境益蒼老罷官歸

遷邑城外八字橋述父訓以示子孫著有述訓編歿後詩文稿多散失孫乃疇哀集之得三百餘首名桃硯齋詩文稿與自輯之春餘吟藏於家乃疇字獻九操履耿介淹貫五經尤邃於易貢生曾孫日熙字臺卿亦貢生深於春秋

徐薌坡字蒼林居小蒸之菱蕩灣縣廩生乾隆三十年春

南巡 召試入二等命在 武英殿纂書是年選貢既 廷

試輦下重其名大學士梁國治尤愛之屢試北闈不遇時周

震榮任永清知縣延諸幕屬主清暉瑞林兩書院居三年復

入京師病瘵卒

陸范鏞字繡巖慶臻曾孫與同里王昶以詞賦相切劇詩學

三唐駢體文宗四傑昶亟稱之書倣歐陽畫山水出入倪董

夏雲龍字成天少時從陳麟詩蔡瓏游與昶同筆硯補金山

衛學生孝友謹飭植品自好里黨咸推重焉

邵玘字珏庭附貢生未冠游庠肄業紫陽書院有聲王峻沈

德潛主講席極譽之一時名流盍簪倡和樂與訂文字交乾

隆甲子鄉試上元知縣袁枚力薦玘不遇遊河南商邱陳履

平聘教其子淮同邑張宏燧任桂陽州延修州志歸葺釀花

小圃跌宕文史四方文士造訪者接軫焉所著詩詞詳藝文

年八十四卒從弟璞字節珊從子淮字遇清皆諸生工詩

張紀宗字雲周乾隆辛卯舉人少英敏善屬文尤長於詩幕

游江西為吳大勳所深賞延之課子乙未禮部試罷歸卒臨

清舟次陶本華字復岡爾毯族孫通才瞻敏尤精算學從姊

婿吳大勳入都又同至江西與紀宗聯吟相得復遊雲南十

年始歸乾隆癸未入縣學遊學除名甲寅復為諸生

汪時鳳字鳴岐性開敏過目成誦弱歲餼於庠六十始登鄉薦發言砥行一誠不移惟以獎引後進爲己任嗜書至老不倦以冬夜擁被把卷火焚其帷中毒而歿子立誠字詹吉恩貢生德容藹如與從兄和孝有二汪先生之目和孝字全一增廣生

陸貽穀字鷺傳諸生晟之孫也幼卽工詩曾與廖景文繆孟烈汪烈輩唱和成帙年甫四十而卒嘗與新安吳墨怡論詩舟中整襟曰詩非兒戲一字一句嘔盡心血而爲之耐可留詩不畱命人稱詩癖

夏傳禮字立庭少補縣學生旋食餼文法唐宋八家兄傳詩亦縣學生稟性和藹好爲人排解同里稱之次子惟貢廩膳生亦有文名早卒

陸伯焜字重暉瑜之孫也瑜見懿行傳乾隆三十八年東巡召試 欽賜舉人四十五年成進士改庶吉士授編修乙巳大考第一陞侍讀學士辛亥改吏部員外郎累遷鴻臚寺少卿擢江西按察使調浙江旋引疾歸伯焜少以詞賦稱及入直軍機畱意朝章典故金壇于文襄敏中倚重之著有玉笥山房詩鈔孫壽銘字晴初諸生幼耽墳典五七古詩有深嗜妻汪氏號紉青女史亦能詩閨中倡和甚相得也紉青早世哀悼過情無聊縱酒卒著有酒邊集汪有扶雲吟稿陳文述序子俊彙而梓之

沈求立字志三父懋功恩貢生工吟咏求立亦恩貢生博洽能文講學授徒從游日眾知縣楊卓修縣志屬以分纂無子以從子廷枋爲後廷枋諸生與兄廷枚篤友愛歷任必借多

所襄理家居訓蒙不謁官長卒年七十五

楊祖健字律夫乾隆癸卯舉人幼失怙恃嫂撫育之與次兄

祖佩同學讀書有悟再上公車俱薦不售歸里教授及門甚

盛趙逢源陸晉雲皆弟子也著學庸直解二卷年五十一卒

王錫奎字文一乾隆四十九年進士改庶吉士授編修充

武英殿提調官戊申分校北闈王子典試湖北癸丑會試同

考官冬出知安徽潁州府未一載以母憂歸巡道李廷敬聘

主敬業書院旋卒錫奎家世貴顯父興堯園亭絲竹甲於一

時顧少年卽耽讀不爲裘馬俗習習在詞垣十年最爲稽

璜器重著有荔亭詩鈔弟鏡景字亭少有幹才以例投効

河工厯官至潮縣州判卒性爽直重然諾爲人謀必盡力好

面折人過人知其無他亦不怨錫奎在潁州時卯教案方盛

興有以無辜竄名者錫景言於兄事得釋從子清輔字翼之

諸生父錫廉字貞五國學生應乾隆己酉順天鄉試卒于京

邸清輔生纔七月也家日落清輔以孤露奮志於學嘉慶末

園居亦廢一椽不庇乃移家泗涇放情詩酒卒無子錫廉著

有玉藻書屋詩稿

陸友松字鶴儔沈巷人張湘子張湘見藝術傳友松刻志勵

行嘗著克伐怨欲四箴以自警三十喪偶不復娶居家嚴肅

雖盛暑不袒年六十卒生平見學者不務切近先求高遠或

更務爲剽竊摹擬以爲此不特學術既乖人心亦壞語皆中

時病子旭照舊志作初誤今據沈巷志字瞳初克守家學好與同儕解難

嘗貽書倪倬論古韻往復不已汎濫百家倪無以難也周郁

濱除母服禮懺旭照移書曰誦經消災事理所必無君尙有

流俗之見存乎時稱其讀書好古詩質直悃欵如其為人父子俱諸生旭照貌不揚缺唇眇目麻面而天性篤厚嘗撰先人行狀及先世兩節母事畧不遠數千里乞名人言中歲卒范應璧字東垣宋文正仲淹裔孫徐恕為范氏甥應璧以戚誼游學至邑年十七補博士弟子員後為浙江鹽運使舒希忠為紹興太守延應璧于賓席歲暮歸道經杭州恕雅篤鄉誼應璧竟不謁恕其狷介如此乾隆二十二年 聖駕南巡二月 幸天平山於高義園坊下獻詩 恩賞內緞大合袍一對人皆榮之著有始存草姑存草俱佚

邱思燕字丙南諸生好古能文章兼通樂律世業醫淡於名利吳大勳銜恤歸家兩窗話舊謂思燕曰如君才識苟事舉業何患不破壁惜誤岐黃術耳答曰無論綆短汲深即使能

中亦如君之父子不相見兄弟妻子離散矣人稱其亮直孫烈愍士美墓湮沒已久思燕訪得諸鄧尉山為戊申姑蘇游記載其事金榮字貞儒諸生與思燕交朋友如兄弟

俞玉海字承天府學生斡山人贅居邑城品行峻潔不合時趨時稱俞怪與董衍大李大綬方玉臺為詩友無子祇一女瑛能詩早夭嗣妻亦亡仍鄉居以終著有村塾紀年詩李大綬字維容領鄉薦後不久卒邑人陸重暉佚其字諸生子習農有詩一卷楊三俊從故麗中得之亦斡山人

金章字克昌增生幼慧嗜學文倣孫樵詩詞俱入妙書法有晉人風韻邑冠禮久廢章為諸子加冠集戚族設宴醮之人推其好古著橫泖山莊詩稿職思其居文集詞稿章敦行有壽重遊泖水後又八年卒

張汝遇字道谷號水垞諸生本籍嘉興父奐曾國學生贅金澤蔡氏遂著青浦籍汝遇少工文居貧力學授徒自給中年棄舉業檢飭家事寬厚和平不苟取與嘗謂子孫以讀書為正即徒他業而守己待人之道不可不知縱有非禮犯我置之弗論所謂無辨息爭也著有竹林吟稿晚自撰竹林先生傳卒年七十有七門人私謚和簡先生教諭武進呂星垣誌其墓同里黃鋒字用之亦工詩

王庭蘭原名史字晚香本太倉王氏父天發字毓駿著有心遊閣詩詞鈔廷蘭幼承庭訓以詞賦擅名乾隆三十九年舉人入都為紀昀陸錫熊分校四庫書恥及權門以大挑選睢甯縣訓導五十四年成進士歸班赴訓導任旋授河南浙川知縣時白蓮教匪擾秦楚沿邊俱重兵退賊東竄廷蘭修

城郭練鄉勇轉輸糧餉支應無虛日積勞成疾巡撫顏檢憐之為具奏別補旋病卒於南陽客館廷蘭性廉潔歿後敝書數篋囊橐空懸同官賻之始得歸櫬著有水竹居詩鈔倪泌字賓肅一字翠岑居西湛貢生好學不倦自勵清操以袁氏世範為家訓故內嚴而外和家風醇謹子弟咸讀書敦行鄉黨善人皆好之每逢春秋佳日必作文酒之會詩亦馴雅從子有常字恆久雅潔自好歿僅中年諸生
 蔣維淦字衷和強記不忘年十二隨父雲鳳幕游襄陽十七之京師二十之山西三十成進士待選旋里詩文益工及選鳳陽府教授病不克赴歿於家年未四十也子念晉字受茲歲貢生明敏勤學貧而廉潔教授弟子多成名者著有米隍詩文集亂時佚潘疇克字又徵以副貢中北榜第二逸藻閒

情風雅自負工楷早卒副榜舉人皆前於維淦

胡師謙字象谷優增生鳴遠從孫也夙承家學經明行修師事王鳴盛而與邵玘廖景文游所學皆有根柢徐恕開藩浙右延主師席後館江西夏瑜家四膺鄉薦不售遂絕意功名晚年伏處家巷諸及門有膺顯宦者絕無片紙請託人尤高之所為詩情惜琴德略如其人任澂字幼清性高潔仲兄源從子棻俱名諸生一門相倡和後客溫州以地濕得拘攣疾歸著有久芳齋孔懷合稿師謙序之後因鄰火燬失
王有光字觀國諸生從唐鼻戴駿龐薛鼎銘游性穎悟通經史能以古事參處今事四方就質疑義無虛日弟子最著者黃金鐘陸企照程燦徐淵董用賓皆蜚聲庠序居北楊莊楊維禎別墅也有梅數百本吟哦其下澄心浚慮人稱曰北莊

先生子自申字祿田諸生先有光卒孫希言字啟南監生素明大義周立春之亂鄉愚多煽惑希言既鳴諸官請擒治又力遏鄰里勿與通匪積恨肆劫所居僅以身免後逆黨伏誅同里獲安咸服其膽識粵匪陷城希言又以團勇力襄克復為劉郁膏所稱程燦諸生董用賓亦觀型堂人徐淵字瀛洲貢生善書和睦橋人

陸寶鏢字樹鋒少穎悟以貢生偕弟寶錕入都遊趙佑秦大成之門南北鄉闈四薦不售歷游豫皖楚越間著有歷游吟稿邑建書院寶鏢創其議卒年七十一子晉雲字鯉堂舉人任丹陽縣教諭

葉棟字鏡凡太學生先占上海籍後歸青浦家素裕性豪邁與陸伯焜孫芷佩遊黃溪文酒之盛或擬諸玉山顧氏有長

笛滄波集蓋輯顧仁章信十八家詩而合刻者仁字伯元諸生

陸椿字萬選增生少孤事母以孝聞知縣褚啟宗贈額表其廬椿有知人鑒授徒吳門毛鼎亨年尚幼家貧好學椿悉力造就許為國器後鼎亨果貴顯乾隆甲寅鄉試卒于金陵著咀丸居稿子德良字心培亦增生何其超受業於門知其孤貧卻修脯不受次子德容字在昆附生早卒俱工詩孫海字吟如詩亦工

曹希煌字搢珊歲貢生能詩嘗與徐薌坡相倡和專工制義操選政風行遐邇同時有孫維棟字隆占錢恭宜字敬庸鄒鎬字鴻基方明梓字彙先顧大鏞字序東陸熙字景輝顧松字鶴巢李春榮字敷南皆有聲鬢序

蔡朝杰字持衡父鳳池字佩珊仁厚樸實於書無所不窺修邑志建書院皆極力贊成諸父鳳瀛字鳴雖亦工詩皆諸生朝杰生而瓌瑋面有青癍進止嫻雅讀書輒數行下侍奉尤純謹嘉慶庚申舉人乙丑禮闈下第那彥瞻阿文成桂子也延朝杰為子增福師館穀所入周南人在京之貧乏者彰義門內舊有江南義塚客死人士以時掩骼歲久費不支倡捐埋暴露者築牆界焉同邑某茂才旅卒鳩資歸其喪有四品宗室高祥貧不能學介戴因心受業給以衣食悉心訓迪後領戊辰鄉薦辛未報罷歸里明年以疾卒年三十五
趙逢源字宗遠頤孫也父汝霖字惠蒼歲貢生通才博學為雲間人士所推卒於逢源尉氏署著有平庵詩集逢源嘉慶六年進士授國子監學正改知縣由豫歷閩陞廣東高州府

知府署高廉道幼承家學精研經術尤習於史詩從選入兼步三唐高華典贍所存歸省詩草子福疇手錄餘多散佚內艱服闋引疾在家獎掖後進承辦節孝總旌事最力年六十餘卒逢源早達令汴時迎養父在署多善政人謂悉本過庭訓云王鴻達字用儀諸生汝霖之甥王昶莊世洛偕汝霖輯陳忠裕詩文鴻達襄助甚力昶赴修西湖志鴻達手錄夏節愍集盡心校勘同里生勳字拙民亦諸生讀書崇行師洛亦稱其校讐功勳與鴻達皆居天聖莊

金鴻書字寶函邑諸生本姓尹幼育於金從其姓博綜羣籍尤工吟咏原本風騷自漢魏以迄三唐靡不窺覽王昶雅重之謂其槃槃大才三十年來罕有與儷昶之江西布政使任招之去不期年辭歸南安知府孫某聘主大庾書院亦不往

性狷介不諧俗窮老以沒二子俱天遂無後著有清省堂詩稿鴻書詩學選是選學唐是唐志和音雅卓然正宗其少變化由限於才也邑中詩學自王昶振興後鴻書實後來之傑同時有朱化敦薛光觀鄒登標曹大澄沈麟勳張雅宗陳育姜陸光世方信詩格不同或有傳有不傳要不礙風騷接跡云

方向志原名雄師字介賓增生賦性閒靜篤志好學凡所涉覽必究極精蘊而期諸心得族人功敘字音播諸生能詩張拱字端叔一字舒堂府學增監生兄位字時升增貢能詩工書北游董誥幕著有蓮溪剩稿拱所輯也拱游吳省欽學使幕佐校四庫全書乾隆壬子北闈典試劉墉得拱卷擊賞擬元七日以後場卷為對讀苛摘見遺友朋為遵川楚例

選直隸州吏目未候掣籤南歸不仕子鍾杰字毓三副貢生
募建珠溪書院甚力著有瘦石山房詩草

陳興宗字烈承諸生王昶弟子也博雅多文潛心攷據之學
凡經史異同諸子百家之原委無不津逮昶輯湖海青浦詩
傳金石萃編諸書興宗校讐之力居多興宗頎瘠有威儀家
貧訓徒館三泖漁莊者最久善談論敷談古今壘壘可聽著
有蘇齋集張禮字翼亭亦出昶門昶盛為推引著有秋菴書
屋詩鈔白雲怡悅齋詞鈔楊宗濂字奉頤亦諸生豐頤美髯
律身頗嚴工文詞昶極愛重之所為詩甚富多散軼歿後子
啟晟輯之閩莫烜序禮號竹塘宗濂號蓮塘詩酒甚親同里
有兩塘之目而禮尤工詩餘
韓正泰號古巖國學生氣宇豪邁中歲客都門屢試不第遂

專意於詩著有蘭雪草堂稿屈畲源字星海諸生與正泰贈
答甚多

洪一桂字馥庭太學生家章堰慷慨樂施性沉靜喜顏魯公
書積帖盈案日就臨摹暇則抱甕灌花焚香賦詩長女芬亦
能詩見列女傳

湯運泰字黼良歲貢生篤嗜經史覃精周易旁推交通證據
史事名曰易徵足補楊萬里易傳所未及中年後專事史部
自史漢訖元明史反覆交勘參以別史及百家記載意有所
得輒紀以詩做楊維禎樂府紀事取材博持論嚴與尤侗相
伯仲又注陸游南唐書補闕正訛羣稱博雅著有綠籤山房
集惟南唐書注金源紀事詩已刊行子顯業
顯業字濂農嘉慶十五年副貢性情倜儻賦才宏麗戊寅入

京應順天試過揚州於劉金門席上詠五排八十韻刻燭而成一座盡傾旋依史望之學使幕再入京復從周肖濂遊途中倡和繁富周以鮮荔支西施舌羅浮蝶爲比歿於京邸年僅三十有四有鐵花山館集壻錢誠基號雲根有詩文名與顯業陳以謙有青溪三子之目誠基嘉慶二十四年進士未仕歸卒以謙字福卿恩貢生達子嗣於世父韶工駢體文詩亦典麗吳錫麒稱之

王紹成字繹如副貢生昶族孫也少從昶學詩一遵先正典型劉金門稔其才招致浙江學使幕唱和尤殷早卒王紹舒字作明諸生詩亦清麗簡潔王莊壽字春齡性嗜研自號研傭詩詞亦工皆昶族孫

金鳳藻字尙儀襄長子也襄見儒術傳嘉慶十五年舉人耿介有父風而孤潔過之詩文多作幽邃語綜覽百家過目輒沈思默識不得其蘊常以指甲切其額終日無一語所居南昶山莊四壁皆其手黏簽記存疑以待考訂者同年沈學淵陸我嵩輩咸推爲畏友潘鎔聘修蕭縣志客遊江陰以病歸尋卒

顧元龍字寶光天桂子弱冠補博士弟子員瀏覽經史著聲庠序性誠慤言動一循乎禮歷試優等好學不倦嘉慶戊辰欽賜副榜癸酉 欽賜舉人著有曉江詩稿子初昱諸生莊師洛輯陳夏詩集父子竝贊助焉道光時耆生 欽賜副榜者戴鎮字甸安亦有文雅名

陶耕書字起雲諸生居王家涇倜儻不羈博覽羣史喜談刑政之學偃蹇不遇人有調之者拒弗納嘗於朋輩大言曰末

士不知廉恥輒干乞以為生所謂小人懷惠其極至於不可言聞者咸笑其狂答曰百年而後當有謂耕書不狂者其豪致至老不減

蔡文治字德彥通敏好學弱冠補諸生工詞賦尤長於詩從王昶討論乃一宗唐人內行篤謹經籍中有觸前人諱者輒嗚咽流涕掩卷置之葬諸兄課諸姪友愛之性形諸歌詠聲有餘哀乾隆丙午分修邑志文治采遺文古蹟甚詳清羸多病卒年三十有一文治與諸聯陳琮有青溪三子之目著有得研詩鈔兄文星字映台亦諸生能詩

吳文徽字琴節一字商隱附貢生沈靜簡默少孤多病稍長始力學酷嗜吟咏王昶授以詩法舒寫性情冲和淡泊不事雕繪子應疇字炳常國學生遊胡師謙鄒登標之門與錢侗

為文字交吐屬淵雅又急難卹困有長者風

高培源字師厚增生王昶弟子幼失怙母席氏以節孝聞培源事之盡歡建宗祠修族譜募築同仁廣濟育嬰諸堂救災卹鄰輒承先志為之敏而好學嘗與修松江府志侍郎莫晉稱之為良史才通達時務嘗謂會通一河時有淤塞海運不可廢也著海運備採一書檄呈 乙覽時雖未見用而道光乙酉甲午兩遇河塞議由海運不外培源所著條論又修邑城浚吳淞行荒政當事皆用其籌畫子成基字繩武幼穎異遇目成誦甫六歲祖母席授以四書即通曉其義以拔貢生考補武英殿校錄 皇清文穎告成優敘得校官尚書劉環之慕其才延諸家課其兄子若孫年未四十病卒京邸楊基字兆啟縣學例貢生任甯國府訓導培源修府志時基偕參

校

曹組城一作城字式金家小蒸讀書好學陳興宗王肇和相友

善曹宗儒貞溪編十卷不傳組城復為集錄網羅文獻人稱

詳贍王昶比之汪永安紫隄志復著論語移是說孟子補罅

諸書

顧後興字立堂父我楫早卒後興甫七歲母吳江沈氏勵節

撫教補縣學生復使從吳舒帷受業見聞日廣乾隆庚戌後

興與陸旭照輯沈巷志卷帙粗備旭照歿越二十年后興取

稿增刪序之其方外不立傳附於雜記識者韙焉郡守宋如

林修府志後興采輯頗勤

陳琮字應坤諸生居岑溪謨五世孫也謨見隱逸傳琮少喜

詩詞溫厚謙退從錢大昕遊博極羣籍偕諸聯結吟社王昶

主講青溪書院深賞其才招琮校讐以親老辭益肆力讀書

學古年四十後絕意進取專事撰述嘗與趙逢源論詩曰今

而知作詩之難非病其不似古人即病其太似古人逢源深

服其言晚年坐臥繡雪山房訓課子姓藏書數千卷丹黃寒

暑不輟與弟瓏閉門賡和人比之坡潁云瓏號古芸性情安

雅詩亦宗法唐人瓏子淵泰傳見儒術

黃汝玉字蔭嘉蔡之容字雪芝皆金澤人周鳳池所輯金澤

志四卷二人續補之卷釐為六汝玉詩文渾厚雄健性忠厚

與人交知無不言言無不盡凡里中善舉靡不以為己任子

茂字柘伯舉人深於經學之容性豪邁工詩嗜酒文宗韓柳

字法蘇米遊楚入畢沅幕值川楚教匪亂感憤成詩皆可傳

繼遊越數年歸家貧如洗與倪倬汝玉尊酒論文終日不倦

洒落自如弟之宦字雲廓有孝友聲

鄒硯字同珉廩生居小蒸南宋鄒浩之後乾隆嘉慶間寓居蘇州春秋上丁與祭鄒忠公祠檢篋得叔祖忠榮家傳稿敬賦五排五十韻以闡揚祖德存詩一卷多可傳者忠榮字堯茨諸生有書巢詩稿

潘信籽字亦畚歲貢生肇振曾孫也祖璧性坦直好吟咏父鍾品學高潔皆諸生信籽少孤家貧工書法細行必謹評校書籍考核極精與倪倬湯顯業交善閉戶吟哦終身不與俗事

黃金鐘字鶴樓歲貢生初居張墅涇繼徙郡城家貧年十六即為蒙師以供菽水資性仁厚寡言笑砥行自勵平居端坐如泥塑人耽讀書垂老猶手不釋卷訓徒周摯從遊之士要

無敢有佞越規矩者長子祖耀增生工醫次祖憲自有傳

馬權字德輿廩生居黃渡南里少孤敏慧多聞詩思綺麗工真行書及篆刻同里章寶枝字鐵君嘉定人嵯尹駿業子父歿遊幕兩浙安徽能詩詞皆無子寶枝族人樹福著黃渡志精核絕倫以居不在邑境不入傳

諸聯字星如懋敏元孫少負雋才工聲律有青溪三子詩選錢大昕序聯三子之一也邑有苔岑詩社分韻賦詩十年三舉聯皆與焉嘗從從叔自穀至義烏蘭谿晚葺明齋小識陳琮稱其連峭整潔非說部家所能彷彿郡邑志乘可援此以徵得失稽謠俗著有長寶齋詩集行世

徐嵐字肇炎諸生珠里人少受知于王昶品學日勵早卒著有半畝漁莊詩鈔吳標字南浦工書隱於市肆與嵐同里相

倡和喜為詩歿後詩佚魏容有感舊詩憶之
 何其偉字章人又字書田增貢生世仁子也世仁見藝術傳
 其偉幼解四聲長通六義師事婁莊師洛同里王昶昶與師
 洛輯陳忠裕集其偉任其校刊與奉賢陳廷慶建陳夏祠堂
 其偉與於祀事並設忠裕像于家歲祀不懈詩效陸務觀主
 清澈自見醫能世其傳名滿江浙林文忠則徐姚椿皆深重
 之謂其不僅以醫名者敦孝友伉爽尚氣節宗戚貧嫠時有
 周給臨歿前一月葬同宗久厝之匱十有四年六十四卒晚
 由斁山徙重固弟其章字耀文諸生質性厚重內行純備好
 學深思詩筆醇茂兼工詞早卒著有七榆草堂詩詞藁陸之
 櫬字禹傳亦諸生重固人賦才清麗尤善書與楊三俊陸我
 嵩其章同志勵學

吳廣成號西齋諸生負雋才淹通羣史好為古文辭輯西夏
 書事一書一遵綱目編年之例自唐僖宗中和元年迄宋理
 宗寶慶三年三百四十一年中世次昭著行事詳析寒暑十
 周始蕝事石韞玉稱其予奪嚴采擇慎得古良史之遺意從
 子熊諸生書事成熊為跋
 周郁濱字仁望諸生軀羸貌古不營名利性嚴毅風裁整峻
 雖盛暑不袒居小江村村農有過其門者或衣冠不正望見
 其危坐輒却步不敢前讀書目數行下博覽九經十七史嫻
 吟詠從曹錫寶錢槩遊俱器之及遊幕中州山左名流所學
 益進詩文並有名因宅邊栽十柳又自稱十柳山人云次子
 綸字仲勉歲貢生咸豐庚申避亂於章練塘章故僻壤勉承
 學士自綸講學其中比戶始有絃誦聲不數年文風遠出諸

鄉上論者謂綸能開風氣之先焉趙斐友字恂儒性情蕭澹
 機警過人詩和雅郁濱與之論詩最相合歲貢選桃源教諭
 孫峻字耕遠監生孫家圩人世業農修築本圩塘岸務盡心
 力水潦不害嘉慶九年水災愚民多病餓死峻目擊傷之爰
 著圩岸圖說謂圩形如釜須有圍岸搶岸高下相鄰之際尤
 不可無畔岸塘岸禦外水無搶岸則高塍內瀉低區必渰無
 畔岸則有水釁滲漏之虞其要在備闕竇以放上塍水撤倒
 溝以披中塍水疏澗沼以消下塍水言甚切近為農家不可
 少之書諸聯稱之同治時知縣陳其元得其書捐廉俸梓行
 請諸行省頒發各州縣

黃祖憲字季仲拔貢生敏而能惠嘗質衣服釵釧代沈某贖
 其女弟聘物鄰莊氏婦患難產叩門以告取箱中錢不擇數

與之婦賴以生厥後境益困至饔飧不給勿顧其貧而急人
 急類如此所為詩清雋有逸致

蔡春雷字憩泉文治次子也少孤貧年十六不能具修脯父
 執潘徵蘭招至塾溫習經子三年入學人稱其敏速長益工
 文詞道光時彙旌節孝校刊王昶湖海文傳春雷皆悉心
 助理著意有餘齋集博雅秀麗人比之朱彝尊徵蘭號蓀谷
 諸生

陸曰壽字蔭嘉諸生性疏直讀書好瀏覽不為章句之學多
 聞舊事喜談當時得失鄉國利病衝口而出衮衮不休家素
 羸博求古物嘗得嘉定張雲章所藏山研因自號研文顏所
 居為柳米齋以研有柳公權米芾題名也所著吳淞江雜事
 詩多載里中文獻宋如林重修松江府志曰壽與為搽採

顧誕朝字頤堂拔貢生元龍孫也守身如玉時稱耿介人
 王先琨號笠華秋涓涇人生有至性喪繼母過時猶悲哭弟
 幾至失明與陸我嵩同學相善我嵩赴閩邀先琨同往襄理
 甚多後我嵩卒於任復竭力經紀其事人以爲難嘗從林文
 忠則徐遊感憤時事著拘墟私語一書姚椿推重之兄先琨
 字辛白兄弟同人學皆能詩

蔣清瑞字愚溪附貢生能詩有芝隱山人詩稿王浚字賓竹
 從陳畹受業所學日進有琴言館詩稿汪大經稱之唐備銓
 字萃真早卒有青珊瑚館剩稿倪倬爲作小傳三人皆澱濱
 人浚居漁郎村清瑞居汪洋村備銓居西澱市

吳淮號秋橈道光二十年舉人天才豪邁植學淵博工詩古
 文和雅而駿健每有著撰輒達人所不能達同儕無不推服

爲最從遊甚眾莊世驥蔡鈞陶俞廷颺皆出其門性慷慨宗
 族鄰里有告急者罔弗應擔石無儲豁如也沈炳垣過青以
 舊知招赴宴談至夜分歸援筆成八律以贈炳垣依韻和之
 爲泊船半日

沈樹金字杏亭歲貢生居南村品學兼粹毛詩義尤能穿穴
 無遺及門極盛先後有周鵬飛字凌九唐弼字古彬葉荃字
 子湘李鴻字雲莊潘承基字寬夫壽應培字硯農周溯濂字
 肖蓮俱以善訓徒稱荃工受書應培工醫

熊其光字韜之生而目光炯炯動止異常兒比長好讀書過
 目不忘道光二十六年舉人明年成進士授戶部主事乞假
 歸歲己酉大水邑令某侵蝕帑銀逾萬饑民死者相枕藉其
 光憤甚條呈十六不解上大吏不報而令卒以是奪官遠近

快之咸豐初周逆亂巡撫吉爾杭阿收復邑城其光總團防事上海久未下軍需孔急其光詰奸籌餉晝夜不少休逆黨之擒馘至者為請於令分別脅從全活極多前後署令輒倚為重錢德承尤深契乙卯元旦上海平是歲九月以積勞感疾卒年三十九其光性剛嫉惡如仇其筦局事雖親故不少假人多缺望及卒陳襲衣貧不能具蟒畫工田某取舊衣以意畫之於是共服其廉為學好深思博辨凡天文厯算輿地河渠農田之屬無不通恆以經世正俗自期時袁枚隨園詩派方盛其光力排之於國朝諸儒中素服膺者顧炎武及胡天游洪亮吉汪中嘗繪一師三友圖以見志

洪樸字鳳章晚稱二知翁例補縣佐棄官不就選肆力為詩深於擬古五言尤渾勁沈吟苦思至老彌篤善畫牡丹許國

柄稱其得意之作與南田惲氏頡頏旁及篆刻音律功皆精到子印驪字子良巨增生長於經學工詩詞尤善鼓琴所著俱見藝文

何其超字古心父世英字春園邑廩生內行馴謹工詩能書卒時其超年僅十一母氏陶訓之嚴受業於陸德良弱冠為諸生與陳淵泰沈蓮結二卯文社旋學醫於從兄其偉繼交婁姚椿友而兼師詩文深得指授嘗赴張祥河河南臬署之招扶溝知縣唐鑑延主明道書院一至京師游嵩山而歸粵匪陷邑宅被焚移家浦南滬上澱西者數年同治戊辰復構棗花書屋始還斡山焉卒年六十九恩貢生就職教諭嘗謂古人君臣之際不能明言每託諸夫婦臣道也婦道也故發乎情必止乎禮義近人詠此體語涉穢褻別無寓意未免為

風雅罪人沈蓮字則明諸生初居方家窰後徙岑溪性孤介閉門謝俗詩筆亦高古

胡履吉原名家錕字理生寶瓊曾孫也少從兄家濂裘學慧甚及長才思清麗時目爲胡氏三傑履吉以舉人大挑得校官署吳江教諭選任蕭縣訓導初至吳江觀風課士愛其童才拔置第一招入署親課文藝後果成名蕭縣久無科第段廣瀛受業於門履吉造就甚勤丙午領鄉薦咸豐時入翰林履吉有卓異名保陞知縣引見不用壬子成進士改庶吉士乞假歸里粵匪久踞江甯道梗不得北上知縣劉鄒膏延畱籌餉蘇常有警偕知縣廖秩璋招勇防堵庚申五月邑郡城陷日與秩璋參將李恆嵩謀克復勸捐助餉練勇數百當先名曰青勇眾皆畏其難履吉力任之不辭勞勩及同治壬

戌七月十四日攻城冒暑得霍亂疾回郡甫聞城復而卒年六十卒後無以爲殮羣謗乃息識者稱其篤志天性孝友篤于親舊著有理生居詩稿家濂字方周諸生次兄袞原名家懷號端齋廩貢例選訓導質性剛方學有根柢深究性理所著敬天說俾學者易持循焉

莊世驥字俠君咸豐九年舉人世居盤槐里自爲童子出語已驚長老時婁縣李繼膺讀書徐侯宅侯喜結客提倡後進世驥適鄰其右與熊其光俞廷颺晨夕過從結吟花詩社有四才子之目洎設帳城西因材設教分經別史無不有成居恆手鈔筆識專事擘經吟詠日寡嘗曰特患胸無詩味耳不作詩未必非詩人也後避亂泖東邑舊令馮樹勳率炮船駐泖塔世驥籌助軍柴最久迄於成功卒年五十有一兄世騏

字雲衢增庄勤學好古手鈔經史滿架丹黃紛然同時目爲二難侯字廣涵監生著有蘭吟詩草許章含字蘊伯居白鶴江鎮世驥弟子也不耐作時藝通許氏說文古樸不諧俗得瘵疾早卒

金玉字曼鴻歲貢生父熙字二溪著有莎湄詩稿玉八九歲教以唐詩知頴悟十二歲卽能和父詩時吟社方興玉偕四子分題鬪韻遂與莊世騏李雋合爲青溪七子焉馮樹勳令青時深重玉詩移任南匯招入芸香草堂詩文會酬唱愈盛晚遭亂獻書於巡撫某言兵單由餉絀蘇常失守逃官甚多可勸捐以充軍食某怒之羈玉滬上者數月旣免鬱鬱客授以終俞廷颺字形侯邑廩生曾祖臺字履安舉人廷颺幼穎異在吟社中玉每多微辭而熊其光謂廷颺天分獨超李聯

琇學使深賞其詩文與奉賢李花卿南匯丁宜福目爲雲間三子亂後遷居墓舍賊聞讀書聲欲夜獲之踰牖逃流徙至浦東宜福延諸家旋以喘疾卒宜福歸其喪李雋字雲橋廷颺同門也附生才氣豪邁詩詞曼曼然自異聖堂頭人玉弟子有陳英錡號又愚諸生舉人查圭子穎敏絕人幼讀十三經悉背誦手鈔之詩及駢體皆雄健玉目爲畏友陸斗寅字指隅嗜茶因自號次羽少孤母教嚴學日進長工書喜作詩賦與蔣汝枚洪泰階訂忘年交訓徒有聲嘗語學者曰當先求靜遇事不可妄動泰階字彙吉諸生諸德畚字少蘭縣學生工書法得趙孟頫筆意食餼後幕游河南歷覽嵩高少室之勝字學益進家貧會有貨金聳之使出廩缺者德畚曰吾不忍名不登明倫堂且以功名爲奇貨

毋乃士名而市行乎熊其光高其節延賓諸家郡城某為訟事逮繫其光請託不可得客欲因於德畚時天寒雪客曰願公一言一狐裘易易也德畚拂然曰此豈所以自待更何以待蘇林蘇林其光別號也客慚而去後當道以碩望聘講鄉約并訓義塾年六十一無疾而終

周南字荔軒邑廩生父鼎監生嘗從王袒入都名流咸重之遊幕至楚鎮算用兵時有功當敘以與督師者不合拂衣歸南少慧九歲能和尖義韻長就婚周浦趙氏奉母以居屢空晏如文行皆有過人者遭亂病歿滬寓葬周浦羣以比宋詩人儲泳

沈道字立生諸生謹厚質實輯青志續修備采一書分類摭錄足資考證咸豐時章堰土人發古墓石槨道偕陸時英訪

得殘碣知為元延平蒙古字學教授章伯顏墓伯顏章氏譜訛為顏者也其實事求是如此時英字實甫為人肫摯廉正同治紀元孝廉方正科久虛同人薦舉以應時英聞之固辭不許好吟詠工隸考究字畫不苟縣志設局時時英披采同里忠義節孝無濫無遺旋卒年五十九

陸日愛字義叔吳江籍世居金澤例候補浙江府同知少器量年二十餘始向學從婁姚椿太倉畢華珍遊又與同邑潘緯沈曰富陳壽熊元和陳克家為友性慷慨見義勇為道光末水災日愛平糶助賑及募捐撫恤邑令倚之如左右手叔善堂義學出良田助成孔宅庭聞及珠溪書院咸豐十年粵匪陷城日愛與同志者募資雇勇謀復青邑十一年春提督曾秉忠兵駐泖湖都司李恩彪率炮船駐防練塘日愛募

捐餉募勇極盡心力冬奉巡撫薛煥命益兵設卡關王廟查防殿山湖未十日獲賊數船賊不敢近時賊烽甚熾金澤三面隣賊日愛晝夜巡防衣不解帶者兩月天寒雨雪西南兩路賊猝至城賊亦糾大股西竄恩彪分兵接戰不利團勇亦潰金澤遂遭焚掠同人咸悲其志同治三年遭母喪旋病卒

捐軀募勇極盡心力冬奉巡撫薛煥命益兵設卡關王廟
 防殿山湖未十日獲賊數千不敢近時賊烽甚熾金澤三
 面陸賊日憂晝夜巡防衣不解帶者兩月天寒雨雪西南兩
 路賊卒至城賊亦請大股西竄恩彪分兵接戰不利團勇亦
 貴全澤遂遭殺戮同人感悲其志同治三年遭世喪旋病卒

